

APOKORÍPISI

Xesosi Kristo Iuaka Oerekiniua Pirena

Ia Aãtsopa Oerekaua Xesosi Kamakiti

¹ Ia aãtsopa oerekari Teoso nakitiakori Xesosi Kristo paítiki kamaenetakiti. Teoso iokanitari inítiri iaxitikiri Xoãomoni Xesosi Kristo kamaenetakiti oerekini íkapani. ² Ikinika Xoão atamatakiti, ikinika ikenakotakiti pakini isãpireta ia aãtsopaã. Ikara atoko isãpiretaua ate Teoso sãkire, Xesosi Kristo sãpiretakiti iuamoni. ³ Ia aãtsopa atatsopatakani Teoso takariko erekari ninoamoni. Teoso takariko erekari ia isãkire kenakotakanimoni, ia isãkire kípitanimoni, kotxi ikinika Xoão iõkatsopatakiti okatapaniri apokini.

Xoão Iõkatsopare

⁴ Nota Xoão. Niokanitari ia niõkatsopare Teoso mereëkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hĩtemoni. Ikamaerekaxiniretai hĩte. Uatxa iua aua. Merepitipanika kitxakapiríka iua aua. Iua átipirika auapikako. Setxi matamatakoni iaxitikini Teoso topãkiniãtaã apisatoõ auakani sikari erekari hĩtemoni. ⁵ Xesosi Kristo apaka sikari erekari hĩtemoni. Atão inakarinoka sãpiretakari itxaua iua. Iua merepitipanika õkitikaua ipĩkani sauaki. Apaka itixi auakani auĩteakori auĩte itxaua iua.

Iua ate tiretakari. Ipina ate íkapani amaerekani imaktxakini íkapani, ininiã isikakaua erekari

akamini ĩkapani. ⁶ Itxĩkitakaua auĩtetxiakori aniniua. Itxĩkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Ātipirika peerekai pite. Ātipirika pitenokara kaposotiireri. Ameẽ.”

⁷ Hātamata, Xesosi napani. Iua inako katxiārikata. Iuasaaki ikinimane kākiti atamatariko. Aamina ĩpiriāmitakari nopini iua tokakitakani apaka atamatariko iua. Iuasaaki ikini uākati kākiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameẽ.

⁸ Apiananiri txari:

—Iōkatxi merepitipanika auakari Aopa inakori atoko nitxaua. Iōkatxi imapotōkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni —itxa.

Xoão Atamatarī Aĩtari Iaxitikiri

⁹ Nota Xoão, hĩtari. Nikamari Xesosi Kristo nireēkiti, ininiã himoianari nitxaua, kotxi ātipirika nimĩteenekari nimisiritiko, hĩte misiritiko himĩteenekini atoko. Ikara misirikaretxi apokapitika atemoni, kotxi aãuĩte Xesosi Kristo nakitiakori atxaua. Nota aua Patamosi inakori pokomiriĩti. Nitakaãka uai, kotxi Teoso sãkire nisãpireta apanakinimoni. Ikinipoko nimarotakiti Xesosi Kristo pirena nisãpiretini xika kākiti takano nota uai. ¹⁰ Kākiti Apiananiri xinikini õtisaaki, Erekarī Matamatakoti sikaimaroretano nota. Iuasaaki nikenakotari sãkiretxi nitikinimoni. Sãkiretxi apiaenetakari, trōpeta atoko nikenakota.

¹¹ Itxari:

—Kākiti apisapanika naua nota. Nota auapanika ikinipoko xipokaāka atoko. Piōkatsopata aātsopaā patamatakiti tīkane. Eereka piokanatarī iua aātsopa kākiti Teoso mereēkinimoni setxi sitatxiti auakanimoni Ásia tixineē. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

¹² Ininiā eereka nikirioka notakata sākirauatakari natamatini īkapani. Nikiriokasaaki, natamatari setxi tirikapi topākini oro kamakori.

¹³ Tirikapi topākiniātaā, natamatari kākiti itari iaxitikiri, iuaritika ipinimoni itxaua. Iua māka ōtanori. Ikitiāpeka apoka. Ipakiomatare atoko oro kamakoro aua itorotamoni. ¹⁴ Iāko iteene kasarori mapoa atoko itxa. Xamina tirinakari atoko itxa oki. ¹⁵ Ikiti mēkorīka pirōsi xamina āki imēkorīkini atoko. Isākire ene āparaā torōkani atoko. ¹⁶ Iuako ikikomoni imaīkaro setxi iōriki. Inamaā iouata mitari pokīka. Iua iouata ipi uanaro aua. Atokatxi iotximere atoko itxa itoō.

¹⁷ Natamatakasaakiri, nirika ikitimoni. Koriākari atoko nitxa. Ininiā iuasaaki itakari iuako ikikomonikiri nota nopini. Itxano:

—Kona pipīkarauatape, kotxi ikinipoko auini apisapanika nota aua. Ikinipoko xipokaāka atoko nota auapanika. ¹⁸ Nota auākipika inakarino. Nota koriākaripekano, iuaritika hātamatanano. Ātipirika auāki inakarino nota. Ameē. Kaposotiireno nota, kotxi nipaniātari kākiti ipinini. Niposotiire aua niokanatiniri kākiti maerekati kamakani

misiritikoãtaã. ¹⁹ Piõkatsopatari mitxi patamatak-
iti, uatxaika patamatakiti pakini. Apikomoni
noerekakiti apaka piõkatsopata, kotxi noerekaiko
katana itiximoni ãkari. ²⁰ Kiripa ninoa iõriki setxi
pakini niuako nikipomoni auakani? Teoso ni-
tiriakori itxauana. Ninoa anikari nota sãkire
nisãkire auiãkanimoni ninoa setxi sitatxi auakan-
imoni. Kiripa ninoa setxi tirikapi topãkini oro
kamakori? Nisãkire auiãkani ninoa setxi sitatxi
auakani itxauana —itxa Xesosi Xoãomoni.

2

Xesosi Iokanapirena Épeso Auakanimoni

¹ Xesosi misãkiretari Xoão:

—Piokanatariko ia nisãkire Teoso nitirimoni,
Teoso sãkire auiãkanikata auakarimoni Épeso si-
tatxitiã:

Ninoa setxi iõriki maĩkakarino nota. Nimaĩkari
ninoa iõriki niuako nikipomoni. Ninoa
setxi tirikapi topãkini oro kamakori sauaki
tĩpokotakarino nota. Ia nota sãkire. ² Nimarotari
ikinika hĩkamakiti. Nimarotari itori parĩkatxi
pamimari hĩkama. Parĩkatxi kamimari
inakasaaki, kona hĩtakanapari. Maerekati
kamakani apokasaaki hĩtemoni, kona hĩte
apakapana. Apokapeka apanakini kãkiti
hĩtemoni. Itxana: “Teoso iokanatakiniraua ate.”
Txamari, kona atão ninoa sãkire. Nimarotari
kona hĩte auiritana ninoa kaminiri maerekati.
Hĩte atamakaerekatana. Eereka himarotari
kona atão ninoa sãkire. ³ Himisiritaãka
nisãkire hĩsãpiretini xika, iuaritika himĩteenekari
ikinipoko nota ãkapani. Kona hĩsãpaka
hĩparĩkauatini nota ãkapani.

⁴ Ikara hīkamakiti erekari, txamari hītakanapari hītiretinino. Merepanika hītiretano. ⁵ Hīxinikariko merepitipanika hītiretinino. Uatxa poiãoka hītiretano. Iuaĩkana hīkamariko merepitipanika hīkamakiti atoko. Himatakanapakaniãari ikara himaerekani, patimari napokini hītemoni. Nimakatzakariko hītirikapite topãkini. Ininiã Teoso sãkire auiãkani ! auaike ereẽ, himatakanapakaniãari ikara himaerekani. ⁶ Auapitika atão hīkamakiti, kotxi hīte omanatari Nikoraito inakoni kamakiti. Nota apaka omanatari ninoa kamakiti.

⁷ Kakenakokii hīte, ininiã hīkenakotariko Erekaru Matamatakoti sãkire Teoso sãkire auiãkanimoni. Maerekati makamakati nauiritako amãtiiri Teoso tixine apanĩkaki auakari itximini. Iua amãtiiri tximakari auapika ãtipirika Teosokata,
—itxa Xesosi Êpeso auakanimoni.

Xesosi Iokanapirena Esimina Auakanimoni

⁸ —Piokanatariko ia nisãkire Teoso nitirimoni, Teoso sãkire auiãkanikata auakarimoni Esimina sitaxitiã:

Ikinipoko auini apisapanika nota aua. Ikinipoko xipokaãka atoko, nota auapanika. Nipĩpe, iuaritika iuaĩkana nõkitikaua. Uatxa ! nipinaika. Ia nota sãkire. ⁹ Nimarotari hãtatsiire. Nimarotari hīte minakati ! auari. Iuaritika ikinipoko erekari aua hītemoni. Nimarotari apanakini misãkirepiretinii hīte. Ninoa txa: “Xoteoakorira ate.” Txama kona atão Xoteoni ! itxauana. Ninoa apotiitiniãtaãua Satanasi nakiti. ¹⁰ Kona hĩpĩkapiri himisiritiko ĩkapani ĩkari. Satanasi takari apanakini hīte kateia

ãki ataerekatinii ïkapani. Himisiritaãkako tesi pakini õti. Atxiïti hïpina nisãkire hãuikini xika, iuaritika kona hïtakanapapiri nisãkire hãuikini, ininiãkara nisikai ãtião saporietà. Iua saporietà apakapakari auapika ãtipirika Teosokata.

¹¹ Kakenakokii hïte, ininiã hïkenakotariko Erekaru Matamatakoti sãkire Teoso sãkire auiaãkanimoni. Maerekati makamakati kona iuaïkana ikoriãika,
—itxa Xesosi Esimina auakanimoni.

Xesosi Iokanapirena Pékamo Sitatxiti Auakani- moni

¹² Eereka Xesosi iuaïkana misãkiretari Xoão:
—Piokanatariko ia nisãkire Teoso nitirimoni,
Teoso sãkire auiaãkanikata auakarimoni Pékamo sitatxitiã:

Notamoni auari oa iouata ipi uana auakito. Ia nota sãkire. ¹³ Nimarotari ikinika hïkamakiti. Nimarotari hãuiniãtaã. Ereë Satanasi kãkiti auïte itxaua. Iuaritika hïte auikari nota sãkire. Kona hïte takanapari nisãkire hãuikini. ãtxipa inakori auama hïte sauaki. Iua sãpiretapikari nisãkire kãkitimoni. Ikara xika okapeëka ereë Satanasi auiniãtaã. Iuaritika kona hãsikano. !Hïtakanapari nisãkire hãuikini.

¹⁴ Txamari auapitika hïkerokakiti. Aua kãkiti hïte sauaki Paraão inakori sãkire auiaãkani. Kitxakapirïka iua oerekari Paraki inakori kãkiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kãkiti kaminiri maerekati iïto nireëkiti ãti kãkiti ïtokata. !Apakata kãkiti auikiniri Paraão sãkire. ¹⁵ Hïte sauaki aua kãkiti Nikoraito inakoni sãkire auiaãkani. Nota omanatari ninoa

auiãkiti sãkiretxiti. ¹⁶ Hĩtakanapariko ikinika himaerekani. Hĩkanapiriãko notamoni. Ikara atoko himakamakaniã, patimari hĩtemoni napokini. Ininiã nineenamauata maerekati kamakanikata mitaro iouataã ninamaã auakaroã.

¹⁷ Kakenakokii hĩte, ininiã hĩkenakotariko Erekari Matamatakoti sãkire Teoso sãkire auiãkanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iõkataãka kãkiti uãka amaneri apanakini mĩmarotakiniti. Apakapakarinani imarotari iuãka amaneri, —itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuaĩkana misãkiretari Xoõo:

—Piokanatariko ia nisãkire Teoso nitirimoni, Teoso sãkire auiãkanikata auakarimoni Txiatxira sitatxitiã:

Teoso ãkirirano nota. Noki xamina tirinakari atoko itxa. Nikiti mēkorĩka pirõsi atoko itxa. Ia nota sãkire. ¹⁹ Nimarotari ikinika hĩkamakiti. Nimarotari hĩtiraõki. Nimarotari iteene hãuikari nisãkire. Nimarotari iteene hĩparĩkauata nota ĩkapani, apanakini ĩkapani apaka. Hĩparĩka nota ĩkapani pasãpaniri inakasaaki, iuaritika hĩkamapanikari nota ĩkapani. Uatxa apiaãpota hĩparĩka nota ĩkapani.

²⁰ Itxama, nisãpiretaiko hĩkerokakiti. Hĩte auiritaro sito, Xesapeo inakoro, maerekati okamini hĩte sauaki. Oa txa: “Teoso sãkire sãpiretakarono nota.” Otxama, omisirienetana ninitiriakori. Oa xika, ninoa kamari maerekati

iĩtona nireēkiti apanakinikata isirĩkinina. Apaka ninoa nikari nipokori teoso kamakori sikakori. ²¹ Niãtapari otakanapiniri omaerekani, txamari kona onirekari otakanapiniri omaerekani. ²² Ininiã nota kamariko oa amianatini. Oakata sirĩkakani matakanapakaniãro, iteene ninoa atatsiirauata. ²³ Oa anaakori nokapitikako. Ikara atoko inakasaaki, ikinimane Teoso sãkire auĩakani imarotariko nimarotari ikinika kãkiti ãkixinire, ikinika ixinikakiti pakini. Ininiã erekari nisikako erekari kamakanimoni. Apaka nimisiritari maerekati kamakani. Hĩkamakiti iaõka niĩkitxitai hĩte.

²⁴ Uatxa nimisãkiretai hĩte apanakini Txiatxira sitatxiti auakani. Hĩte auikari Teoso sãkire. Hĩte lauikari Xesapeo sãkire. Hĩte kona apaiaõkari Satanasi oerekakiti, iua imarore. Kona ninirekari nisikinii apikomoni parĩkatxi nota ĩkapani, kotxi uatxa iteene hĩparĩkauata nota ĩkapani. ²⁵ Ianoka ninireka hĩkamini. Hĩte auikari nisãkire, ininiã hãuikiniritika nisãkire, nikanapiriãko.

²⁶ Iua maerekati makamakati, ãtipirika nipaniãtakiti kamakari, iuamoni nisikariko niposotiire itixi auakani auĩte ininiua. ²⁷ Teoso sãkire kitxakapirĩkari txari:

Auĩtetxi itxauako. Itapararitika ipaniãtana ninoa inireēkiti ikaminina. Imakamakaniãrina inireēkiti, imisiritana ninoa, tiitxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸ Apaka nisikariko iõriki ĩkanõkapanikero iuamoni, ininiã notaka nisikaua iuamoni, kotxi iua iõriki atoko nitxaua. ²⁹ Kakenakokii hĩte,

ininiã hîkenakotariko Erekarî Matamatakoti
 sãkire Teoso sãkire auiãkanimoni,
 —itxa Xesosi Txiatxira auakanimoni.

3

Xesosi Iokanapirena Satxi Auakanimoni

¹ Iuaĩkana Xesosi misãkiretari Xoão:

—Piokanatariko ia nisãkire ninitirimoni, Teoso
 sãkire auiãkanikata auakarimoni, Satxi sitatxitiã:

Notamoni aua ninoa setxi Matamatakoni
 Teoso nakiti. Notamoni aua ninoa setxi iõriki. Ia
 nota sãkire. Nimarotari hĩparĩka. Apanakini
 sãpiretai hĩte auãki hinini hĩxinire, txamari
 Teosomoni koriãkanipekarai hĩte. ² Himereka.
 Araõkire hĩtxapaniko. Hĩsikataparatarî erekarî
 hãkixinireẽ auakari, kotxi iua erekarî
 ipinaariãpota. Ininiã hĩtxĩkitakari iua erekarî
 auãki inini iuaĩkana. Notamoni hĩparĩka Teoso
 apisatoõ na atão. ³ Hĩxinikariko hãpakapakiti,
 apaka hĩkenakotakiti. Hĩkĩpitariko hĩkenakotakiti.
 Hĩtakanapariko maerekati. Erekarî hĩkamako,
 kotxi kiĩtiriri apokini atoko napokako uai. Kãkiti
 kona imarotari kiĩtiriri apokini manapi. Ikara
 atokokana nitxako nikanapiriãkasaaki.

⁴ Hĩte Satxi sitatxiti auakani sauaki aua-
 panika apanakini maerekati makamakani. Ni-
 noa auikapitikari nisãkire. Ninoa kãkiti imãka
 matxikotakani atoko itxana. Ininiã notakata
 isanako. Imãkana kasarori. Ikara atoko nikami-
 nana, kotxi ninoa kamari erekarî nipaniãtakiti.

⁵ Maerekati makamakani ieretakariko
 mãkatxi kasarori. Kona noakapaniriko iuãkana
 naãtsopateẽ. Kãkiti iuãkana ikara aãtsopaã
 auakani ãtipirika auapikako Teosokata. Ikara

atoko ininiã, nisãpiretari iuãkana nirimoni, initiriakori iaxitikini pakinimoni. Nitxana: “Nota nakitiakori itxauana ninoa.”

⁶ Kakenakokii hïte, ininiã hïkenakotariko Erekarî Matamatakoti sãkire Teoso sãkire auïãkanimoni,
—itxa Xesosi Satxi auakanimoni.

Xesosi Iokanapirena Piratéopia Auakanimoni

⁷ Iuaïkana Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auïãkanikata auakarimoni Piratéopia sitatxitiã:

Nota maerekati makamakaturano. Atão inakarînanî sãpiretakarîkarano nota. Kaposotiireri auïtetxi Tavii inakori atoko nitxa, kotxi nota matakakakiti, kona ãti totari. Nota totakiti kona ãti matakakari. ⁸ Nimarotari hïte parïka. Hãtamata. Hïparïka nota ïkapani aapokotxi tore matakakakori atoko itxa. Kona ãti posotari iseretiniri. Ininiã kãkiti !iposotari iotokakinii hïte nisãkire hïsapiretini. Ikara atoko nikaminii hïte, kotxi kona kataparai hïte. Ikara atoko nikaminii hïte, kotxi hïkïpitari nisãkire. Kona hïkipatari nisãkire apanakini apisatoõ. ⁹ Apanakini txari: “Atão Xoteoakori atxaua.” Txamari Satanasi nakitiakori itxauana. Paxirari ninoa sãkire. Nikamariko ninoa kapotoreëkiniãua hïte apisatoõ. Iuasaaki ninoa txako: “Atãopitikara Xesosi tiretapitikai.” ¹⁰ Hïkïpitapekari nisãkire. Kamonõkoniri inakasaaki, kona hïtakanapari nisãkire, ininiãkara apia maerekati ikini itixiti apokasaaki, iuasaaki ninïkataiko hïte. Iua

maerekati kona misiritai hīte. Iua maerekati apokako itixi auakani atamakaerekatini ikapani.

¹¹ Erepaniko, patimapaniriko napokini ereē. Ātipirika hīkamariko erekari. Hītakanapapikariko maerekati. Ininiā iusaaki āti kona posotari imakatzakiniri auītetxi saporietane hītemoni nisikakiti. !Imakatzakarina ikara hīparīka iki.

¹² Nikamariko maerekati makamakati itīkare mina atoko inini niTeosone misākiretiko aikoti āki. Auapika Teoso misākiretiko aikoti āki, ininiā litakanapari Teoso sākire. Niōkatariko niTeosone uāka iua nopini. Apaka niōkatariko Teoso sitatxine uāka iua nopini. Ininiā apanakini imarotari Teoso nakitiakori ininiuana ninoa. Iua Teoso sitatxine Xerosareē amaneri iua tixine katxakakari. Iua maerekati makamakati nopini niōkatariko apaka nota uāka amaneri.

¹³ Kakenakokii hīte, ininiā hīkenakotariko Erekarī Matamatakoti sākire Teoso sākire auīākanimoni,
—itxa Xesosi Piratéopia auakanimoni.

Xesosi Iokanapirena Araotxiséia Auakanimoni

¹⁴ Iuaīkana Xesosi misākiretari Xoāo:

—Piokanatariko ia nisākire Teoso nitirimoni, Teoso sākire auīākanikata auakarimoni Araotxiséia sitatxitiā:

Niuāka “Ameē.” Nota atāo sākiretxiti sāpiretakarikarano. Nikamari ikinika nisāpiretakiti. Merepanika nikamari ikinipoko. Ininiā ikinipoko auīte nitxaua nota. ¹⁵ Nimarotari ikinika hīparīka. Hītxari: “Nauikapitikari Xesosi sākire.” Txamari kona iteene hinirekari hīkaminiri nipaniātakiti. Apaka kona iteene hinirekari hītakanapiniri

nisākire. Kona kapatakari atokoni hǐtxaua hǐte. Kona katxǐkareri atokoni hǐtxaua hǐte. Poomari atoko hǐtxaua. Notamoni apiaerekata kapatakari atoko hininiua hǐte. Iusaaki iteene hinirekari hǐparǐkauatini nota ĩkapani. Iteene himanirekakaniāri hǐparǐkauatini nota ĩkapani, apiaerekata katxǐkareri atoko hininiua hǐte, nisākire ikinika hǐtakanapini. ¹⁶ Notamoni hǐte āparaā poomari atoko hǐtxa. Ininiā kona āparaā kapatakaāri atoko !hǐtxa. Apaka kona āparaā katxǐkareēri atoko !hǐtxa. Ikara atoko inakasaaki !ninarekai. Ininiā mapara nikanakai hǐte. ¹⁷ Hǐte txa: “Katxineiroteua ate. Katiiua ate. Apikomoni anirekakiti !auari,” hǐtxa. Txama kona himarotari hākixinireē iteene himatinaniuatini. Hākixinireē minakati ! auari. Hākixinireē mokiri atoko hǐtxaua. Kasarari atoko hǐtxaua hākixinireē. Ikara atoko hininiā, kona himarotari Teoso. ¹⁸ Nōtākikai hǐte hiamotiniri notamoni auakari oro atoko inakari. Oa oro xamina oeretakito. Ikara atoko hǐkaminiā, ikinika hinirekakiti auako hǐtemoni. Hiamotariko mākatxi kasarori notamonikiri hǐeretakini ĩkapani, ininiā kona hǐpētauata kasara hinini xika. Ikara atoko hǐkaminiā, hākixinire ! auari maerekati. Hiamotariko apaka pinǐtxi notamoni auakari hōki ĩkapani, ininiā atāo hǐposota hātamarauatini.

¹⁹ Nitiretakini nōtākika, apaka noerekana. Ininiā ikinipoko atāo hǐkamako maerekati hǐtakanapini ĩkapani. ²⁰ Hātamatako. Hākixinire toreē nota auapeka. Nota haāpoko maparakiri akiritakari atoko. Hǐkenakotiniāri nakiritinii, hōsereiniāri hākixinire tore, niǐroā hǐtekata nikaikotini ĩkapani. Iusaaki ninipokota hǐtekata.

Hĩte nipokota notakata.

²¹ Nauiritari maerekati makamakati topãkini notakata auĩtetxi topanere nopini. Iua auĩtetxi topanere nota nakiti. Iua atokotxikana nota topãka nirikata auĩtetxi topanere nopini iua nakiti nopini, kotxi maerekati makamakati nota apaka txaua. ²² Kakenakokii hĩte, ininiã hĩkenakotariko Erekarı Matamatakoti sãkire Teoso sãkire auĩãkanimoni,
—itxa Xesosi Araotxiséia auakanimoni.

4

Iaxiti Auĩtetxi Topanere

¹ Eereka natamatari iaxiti tore. Itore imatakakaãka. Merepanika nikenakotari trõpeta atoko inakari. Kãkiti sãkire atoko itxa. Imisãkiretano:

—Uai pina notamoni. Noerekaiko katana auakari tĩkane.

² Iuasaakipeka Erekarı Matamatakoti anikano. Iuasaaki natamatari auĩtetxi topanere iaxiti. Topãkakari aua iua nopini. ³ Iuaã topãkakari kai peereri pomẽkoriri atoko itxa. Iua kai satõnia inakori atoko. Apaka ãti kai sãtxio inakori atoko itxa iua topãkakari. Kisi ãkitari iua auĩtetxi topanere. Iua kisi kai esimeráota inakori atoko itxa.

⁴ Iua ĩtinikata aua vĩtxi koatro pakini topaneretxi. Vĩtxi koatro pakini totiakori topãka iua topaneretxi nopini. Ninoa mãka kasarori. Ikiina aua saporieãta oro kamakori. ⁵ Auĩtetxi topanereãtaã atamataãka ito mẽkokari. Iotxira, iokaamori aua iuaãtaã. Iteene poenexitiri. Iua auĩtetxi topanere apisatoõ aua setxi tirikapi. Setxi

Matamatakoni Teoso nakitiakori itxauana ninoa setxi tirikapi.

⁶ Iua auĩtetxi topanere apisatoõ ipoa ātakaāri atoko itxa. Auĩtetxi topanere ĩtinikata aua koatro Teoso tixine auakani. Ninoa okĩtxinoka xāpokaĩtotakini. Auana okina ikini iĩtoāna. Itorotaāna aua okina. Iporikiāna apaka aua okina.

⁷ Okĩtxinoka xāpokaĩtotakiti āti, ākiti atoko itxa. Ātipekana kema auĩte atoko itxa. Ātipekana aua kiki toõ atoko. Ātipekana kokoi araākari atoko itxa. ⁸ Ninoa ikininape aua imĩkitana seisi pakini. Imĩkitana nopini, ipatapi apaka okina aua. Kona itomatana. Ikini pokamarariti, ikini ĩkanōkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. Ātipirika auakarii. Kĩtxakapirĩka auakarii. Uatxa auakarii. Katana apaka pite auapanika,” itxana ātipirika.

⁹ Ninoa okĩtxinoka xāpokaĩtotakini xipoātakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate ĩkapani erekarinoka. Peerekari iua auĩtetxi topanere topākakari, ātipirika auapika inakari.” Ninoa xikaretari ikara Teoso ĩkapani. ¹⁰ Ninoa vĩtxi koatro pakini totiakori xikarauatakasaaki, ikapotoreēkauana ixitimoni iua auĩtetxi topanere nopini topākakari apisatoõ. “Ateosone,” itxana iua ātipirika auapika inakarimoni. Itakarina isaporiētane Apiananiri apisatoõ, kotxi Teosonokara ikinimane auĩte. Iuasaaki itxana:

¹¹ “Apiananiri, aTeosone pitxaua. Erekai pite, ininiā apakatapitika apaxitinii.

Apakatapitika ikinimane sãpiretinii: ‘Peerekai.’ Apakatapitika pite apakapiniri ikini posotiiretxi. Ikara atão, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,” itxana ninoa vĩtxi koatro pakini totiakori.

5

Aãtsopa Iapiriãkori Pirena

¹ Iuasaaki natamatari aãtsopa iapirikakori iua auĩtetxi topanere nopini topãkakari uakoã. Iuako ikikomoniãkiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamẽkakaniri ãkapani. ² Iuasaaki natamatari ãti Teoso nitiri iaxitikiri. Kataparari iua. Itaparasãkireritika itxa:

—Kiripa apakata imakatzakiniri ia popitari? Kiripa posotari ikatamẽkiniri ia aãtsopa? —itxa.

³ Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamẽkakari !auari. Ninoa ! iposotari ikatamẽkinirina iua aãtsopa. !Iposotarina atamatinirina iua aãtsopa ãki.

⁴ Ininiã iteene nitxiapatata, kotxi iua aãtsopa iapiriãkori katamẽkakari !auari. Erekari kamakari !apokaãka ikatamẽkiniri ãkapani, atatsopatiniri ãkapani. ⁵ Iuasaaki ninoa totiakori ãti txari notamoni:

—Kona pitxiapatape. Patamata ikiraã. ãkiti atoko inakari iua. Xotaa apika mekaniriakori auĩte iua. Tavii apika mekaniri iua. Oerekepekari Satanasi poiãori inini. Iua apiata. Ininiã iuanani

posotari ikatamēkiniri iua aātsopa iapiriākori. Iuanani posotari imakatzakiniri ninoa setxi popitari —itxa iua toti.

⁶ Iuasaaki natamatari soti auīte okakori atoko. Iua itima iua auītetxi topanere apisatoō. Ninoa ipi ipi pakini okītxinoka xāpokaītotakini, ninoa totiakori pakini ākitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatana ninoa ikini itixitimoni. ⁷ Iua soti auīte atoko inakari sari iua auītetxi topaneremoni. Imaīkari aātsopa topaneretxi nopini topākakari uakoā auakari. Iuako ikikomonikiriā aua. ⁸ Imaīkasaakiri, ninoa koatro okītxinoka xāpokaītotakini, ninoa vītxi koatro totiakori pakini patimari ipamakinina soti auīte apisatoō. Ikinikana auari arpa inakori xikari ikaminina īkapani. Imakinikana auari kopitipaki oro kamakori. Naia kopitipaki xāpoka koria atoko inakari peeremariri. Ia kamariāro Teoso sākire auiākani sākire iuamoni.

Amaneri Xikariti

⁹ Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aātsopa iapiriākori. Pitenani apakata pimakatzakiniri popitari, kotxi pitenanira erekari. Pite okaāka. Piarēkaā piamotaua ate Teoso īkapani. Piamotapekaua ikini uākati kākiti sauaki. Ikini āti uāka sākire sākiretakani sauaki piamotapekaua. Ikinika itixiti auakani sauaki piamotapekaua ate.

10 Pite txīkitakaua ate auītetxiakori aniniua, sase-totxiakori apaka aniniua, Teoso ĩkapani aparĩkauatini. Ininiã itixi auakani auĩte atxauako ate.”

11 Iuasaaki natamatari itomaneri Teoso nitiriakori. Nikenakotari ninoã sãkire. Kaiãopokori ninoã. Seĩ mio, apikomoni seĩ mio, apikomoni seĩ mio itxaãpokatana. ! Apakata ninoã iaõtiko. Ninoã ãkitari iua auītetxi topanere, okĩtxinoka xãpokaĩtotakini, totiakori pakini.

12 Itaparasãkিরeritika ixikarauatana. Itxana:

“Soti auĩte okaãka kãkiti ĩkapani. Ininiã ãtipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoã xikarauata.

13 Ikara eereka nikenakotari ikinika iaxiti auakani, ikinika ĩkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti ãki auakani pakini xikarauatini. Itxana:

“Ikinika erekari ãtipirika aua iua auītetxi topanere topãkakarimoni, iua soti auĩte pakinimoni. Ikinika ãtipirika paxitana. Ikinika ãtipirika txari: ‘Peerekana ninoã.’ Ikinika taparãtxi ãtipirika aua ninoamoni.”

14 Ininiã ninoã koatro, okĩtxinoka xãpokaĩtotakini txana:

—Ameẽ.

Iuasaaki ninoã vĩtxi koatro totiakori patimari pamakini.

—ATEosone pitxaua —itxana iua ãtipirika auakarimoni.

6

Soti Auïte Makatxakari Popitari

¹ Natamatari soti auïte makatxakiniri ãti popitari. Ikara natamatakasaaki, nikenakotari okïtxinoka xãpokaïtotakiti sãkire. Isãkire ikarokirauatini atoko itxa.

—Uai pinako. Patamata —itxa.

² Iuasaaki natamatari kavaro kasarori. Kiki aua oporikiã. Iua tapotxi aua. Auïtetxi saporietane sikaãka iuamoni. Iua sari ikini itixitimoni kãkiti auïte ininiua ïkapani.

Ãti Popitari Makatxakiko

³ Eereka soti auïte makatxakari ãti popitari aãtsopaã, ininiã ipi auape. Iuasaaki nikenakotari ãtipekana, okïtxinoka xãpokaïtotakiti sãkire:

—Uai pinako. Patamata —itxa.

⁴ Ikara eereka natamatari kavaro põkamarari. Kiki aua oporikiã. Iua kiki sikaãka posotiiiretxi neenamtxi ikamini ikini itixitiã, ininiã neenamtxi mauakaniãtaã ! auari. Itxïkitakari kãkiti okakakiniua. Isikaãka iouata mitapoari ineenamauatini ïkapani.

Ãti Popitari Makatxakiko

⁵ Eereka soti auïte makatxakari ãti popitari, ininiã ipi ãti auape. Iuasaaki ãtipekana, okïtxinoka xãpokaïtotakiti txari:

—Uai pina. Patamata —itxa.

Ininiã iuasaaki natamatari kavaro pomamari. Kavaro nopini topãkakari aua minari iaõtiko

iuakoã. ⁶ Eereka nikenakotari ãti sãkirauatini okĩtxinoka xãpokaĩtotakini sauaki. Itxa:

—Ipixini kiro triko ĩki, ãti õti kãkiti parĩka ĩkitxikana. ãti, ipixini pakini kiro atarokiri atoko inakari ĩki, ãti õti kãkiti parĩka ĩkitxikana. Iĩtxiã ĩki, ovaã ĩki pakini poiãopanikako.

ãti Popitari Makatxakiko

⁷ Eereka soti auĩte makatxakari ãti popitari, ininiã ipi ipi pakini auape. Iuasaaki nikenakotari imapotõkirekiri, okĩtxinoka xãpokaĩtotakiti sãkire. Itxari:

—Uai pina. Patamata —itxa.

⁸ Iuasaaki natamatari kavaro posẽtakari. Inopini topãkakari uãka “Ipĩkitxi” inaãka. ãti iua tikini sa. Iua akiritaãka “Maerekani Misiritikoãtaã” inaãka. Isikaãkana posotiiretxi kaiãopokori itixi auakani okiniua ĩkapani, ininiã koatro kãkiti auiniãtaã ãti okaãka. Ninoa okana kãkiti neenamatiã, natxiã, amianariã, kaxipiri kaneenamariã pakini.

ãti Popitari Makatxakiko

⁹ Ininiã soti auĩte iuaĩkana makatxakari ãti popitari, ininiã ipi ipi ãti pakini auape. Iuasaaki natamatari Teosomoni sikakori takikoãtaã patapi kãkiti okakoni. Ninoa okaãka Teoso sãkire isãpiretinina xika. Kona itakanaparina isãpiretinina Teoso kamakiti ninoa ĩkapani, ininiã ikara xika okaãkana. ¹⁰ Itapasãkireritika akirikatarina Teoso. Itxana:

—Apiananiri, ãtipirika erekari kamakarii pite. Atãonoka pisãkire. Kirisaakipa pimisiritari itixi

auakani? Kirisaakipa pixikatxिताua ate, kotxi ninoa okaua ate? —itxana.

¹¹ Ininiã mākaxi kasarori sikaãka ninoamoni. Eereka isãpiretaãkana:

—Hiãtapariko apikomoni. Teoso nirekari apanakini hītariakori, initiriakori okiko hīte atoko iniko. Hītariakori okaãka atoko, Teoso xikatxitai hīte. Hiãtapariko ikara ôti —itxa.

Ãti Popitari Makatxakiko

¹² Eereka nitikari soti auīte makatxakiniri ãti popitari, ininiã seisi pakini auape. Iuasaakipeka itixi iteene iakeẽkata. Atokatxi mamãka, sako mata pomamari potxi iãko kamakori atoko. Kasiri kamarãka arẽkatxi atoko. ¹³ Iõriki itori iaxiti auakaro irika ïkorapokoritimoni. Amãtiiri ïtima iokatxaãkiti atoko otxa. ¹⁴ Natamatari iaxiti aãtsopa iapirikiniua atoko. Ikinika ixirata mitari, ikinika ipokomiriĩ pakini makatxakaãka. Ãtiãtaã itakaãka.

¹⁵ Iuasaaki ïkorapokoriti auĩtetxiakori, kãkiti kaposotiirerini, katiirini, sotato auĩteakori, kãkiti katapararini, nitiritxi amotakoni, nitiritxi minakanuia pakini kipataua aarikoã, kai mitari sauaki ixirataã. ¹⁶ Iuasaaki itxana ixirata auĩtemoni apaka kai mitarimoni:

—Hĩrikako ate nopini. Hĩkipataua, kotxi topaneretxi nopini topãkakari, soti auīte pakini nirekari imisiritiniua ate. ¹⁷ Soti auīte misirikare ôti manapi apopeka. Kona kãkiti mĩteenekari ikara misirikaretxi.

7

Sẽto Koarẽta Koatro Mio Teoso Nitiriakori Itixi Auakani

¹ Eereka natamatari Teoso nitiri iaxitikiri timini atokatxi pokĭkinimoni, āti atokatxi ereēkokinimoni, āti atokatxi kimapore sanaremoni, āti atokatxi kimapore kikomoni. Ininiā ipi ipi pakinipe ninoa. Ninoa maĭkari ĭtima ipi ipi pakini itixi auakari ĭtimati. Ininiā ĭtima kona inapaika itixiā. Kona kĕuaāriā !inapaika ĭtima. Kona aaminaā !inapaika ĭtima. ² Natapari āti Teoso nitiri iaxitikiri inaāpotini atokatxi pokĭkinimoni. Teoso ātipirika auakari takaōtxikare aua iuamoni. Itaparasākireritika akiritana ninoa ipi ipi pakini Teoso nitiriakori. Ninoa parĭka itixi, potxoari uiniti pakini imisiritinina.

³ Iua Teoso takaōtxikare auakiti txari ninoamoni: —Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaōtxikare initiriakori itixi auakani teētaā.

⁴ Eereka nimarotari Teoso takaōtxikare apakapakani. Itakaōtxikaākana sēto koarēta koatro mio kĕkiti. Ikini uāka Isaeo tixinikini takaōtxikaāka.

⁵ Tosi mio Xotaa apika mekani takaōtxikaāka.

Tosi mio Hopē apika mekani takaōtxikaāka.

Tosi mio Katxi apika mekani takaōtxikaāka.

⁶ Tosi mio Asee apika mekani takaōtxikaāka.

Tosi mio Natarii apika mekani takaōtxikaāka.

Tosi mio Manasee apika mekani takaōtxikaāka.

⁷ Tosi mio Simiāo apika mekani takaōtxikaāka.

Tosi mio Arevii apika mekani takaōtxikaāka.

Tosi mio Isakaa apika mekani takaōtxikaāka.

⁸ Tosi mio Seporō apika mekani takaōtxikaāka.

Tosi mio Xosee apika mekani takaōtxikaāka.

Tosi mio Pēxamiĭ apika mekani takaōtxikaāka.

Itomaneri Kĕkiti Teoso Apisatoō

9 Ikara eereka natamatari itomaneri kākiti apotiitakaniua. !Apakata kākiti iaōtiniri ikinikana. Aua kākiti ikini itixitikini, kākiti ikini sereti. Aua ikini uāka sākire sākiretakani. Ikinikana ninoa timanāta Apiananiri apisatoō, soti auīte pakini apisatoō. Ninoa mākā kasarori. Aātape aua iuakoāna. ¹⁰ Itaparasākireritika itxana:

—ATEosone topāka auītetxi topanere nopini. Iuara, soti auīte pakini makatxakapekari amaerekani.

¹¹ Iuasaaki ikinika Teoso nitiriakori iaxiti auakani tima. Ninoa ākitana auītetxi topanere, totiakori, ninoa ipi ipi okīt xinoka xāpokaīt totakini pakini. Ikapotoreēkauana itoōna xitimoni, auītetxi topanere apisatoō. “Ateosone pite,” itxana Teosomoni. ¹² Ixipoātana Teosomoni:

—Ameē. Ātipirika ikinimane sāpiretai ereka pinini. Peerekai. Kimarorei. Erekari pikamakiti ate ĩkapani. Ikinimane paxitai. Kaposotiirei. Pataparai. Ātipirika ikara atoko atxai. Ameē.

¹³ Ininiā eereka ninoa totiakori āti pimaāno nota:

—Kiripa ninoa kākiti mākaxi kasarori ieretakani? Namonipa inana ninoa? —itxa iua.

¹⁴ Ininiā nota txari iua:

—Pitera imarotari.

Ininiā iua txano:

—Ninoa iteene misiritaākapeka. Uatxa ixipope ninoa misiritiko. Soti auīte makatxakapekari imaerekanina. Ininiā imākana soti auīte arēkaā arokakori atoko itxauana. Uatxa kasarori imākana, kotxi itxiko !auari. Soti auīte makatxakapekari kākiti maerekani ipīkasaaki, ininiā mākaxi kasarori atoko itxa ninoa ākixinire.

15 —Ininiã ninoa aua Teoso topanere apisatoõ. Imisãkiretiko aikoti ãki iparĩkauatana Teoso ĩkapani ikiniõtika pokamara, ĩkanõka pakini. Ininiã iua auĩtetxi topanere nopini topãkakari auapikako ninoã sauaki. 16 Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. 17 Kotxi soti auĩte auĩtetxi topanereãtaã auakari nĩkatanako ninoã. Iua anikana ninoa sõtoãrimoni. Iuaã auakari sõtoãri iãtakani ãtipirika auapikako. Teoso makatxakariko ikinika iãtsaãna. !Itxiapataikana.

8

Imapotõkire Popitari Makatxakiko

1 Imapotõkire popitari imakatzakasaaki, ikinipoko tsorĩkaxitita Teoso tixineẽ. Ikara atoko ipixini oara. 2 Eereka natamatana setxi Teoso nitiriakori, iua apisatoõ timakani. Isikaãkana setxi xikari kamiko trõpeta inakori.

3 Eereka ãti Teoso nitiri apoka. Itima Teosomoni sikakori takikoãtaã. Kamariãro arikiko koanati oro kamakori iuamoni aua. Kamariãro ito sikaãka iuamoni, Teosomoni isikini ĩkapani, ikinika Teoso nakitiakori amanaãkiti sãkiretxitikata. Ininiã arikari iua kamariãro Teosomoni sikakori takikoãtaã nopini. Oro kamakori iua Teosomoni sikakori takikoãtaã auĩtetxi topanere apisatoõ. 4 Ininiã iuakoã kamariãro txiã, Teoso nakitiakori amanaãkiti sãkiretxitikata kanĩka Teoso apisatoõ. 5 Ininiã eereka iua Teoso nitiri kosekari okoana. Ixãpokakari xaminaminiki mẽkorĩkakariã, Teosomoni sikakori takikoãtaã nopini auakariã. Eereka okari itiximoni. Iusaakipeka aua

karokirauari, mēkokari pakini. Apaka iusaaki itixi iakečkata.

Koatro Trōpeta Pirena

⁶ Ininiã ninoa setxi Teoso nitiriakori setxi trōpetauakini iposope itrōpetane ixōkinina ĩkapani.

⁷ Ininiã ninoa Teoso nitiriakori āti xikarauata itrōpetaneē. Iusaaki katxĭkareri kai soro atoko inakari, apaka xaminaminiki mēkorĭkakari arēkatxiã koketakori okaãka itiximoni. Ikara xika apanakini aamina itixi auakari arika, ininiã ipi āti pakini aamina auiniãtaã ātika arikaãka. Ikinika katsotati arika apaka.

⁸ Eereka āti Teoso nitiri xikarauata itrōpetaneē. Ininiã ixirata auĭte atoko inakari arikatxikata okaãka potxoari uinitimoni. Ininiã ipixini potxoari uiniti arēkatxi itxapekaua. ⁹ Ininiã apanakini potxoari uiniti āki auakani ipĭpe, ininiã ipi āti pakini potxoari uiniti auakani auiniãtaã ātika ipĭpe. Iusaaki apanakini maporoni apaka xipokaãka, ininiã ipi āti maporo auiniãtaã ātoka xipokaãka.

¹⁰ Eereka āti Teoso nitiri xikarauata itrōpetaneē, ininiã ipi āti pakini initiriakori xikarauatape. Iusaaki iōriki mitari iaxitikero katxačkata. Otirika tirikapi atoko. Oĭrika ipixini uini nopini. Oĭrika ipixini sōtoāri nopini apaka. ¹¹ Iōriki uãka, “Kapixiro,” otxaua. Ininiã ipixini āparaã kapixiã. Ipi āti pakini sōtoāri auiniãtaã, ātinoka sōtoāri kapixiã. Ito kãkiti iãtari iua āparaã, eereka ikoriãna, kotxi kapixiãri āparaã.

¹² Ininiã āti Teoso nitiri xikarauata itrōpetaneē, ininiã ipi ipi pakini initiriakori xikarauatape. Iusaaki atokatxi ponikare, kasiri, iōriki pakini

kona iteene !iponikaika. Imamãkapeka. Ininiãkara pokamara ipi ipi pakini oara atokatxi !iponikaika. Iua atokotxikana ìkanõka ipi ipi pakini oara kasiri, iõriki pakini !iponikaika. ¹³ Ininiã eereka nitikarauatakasaaki, nikenakotari ãti Teoso nitiri sãkire. Iua araaãpota Teoso tixine. Itaparasãkireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, ãti pakini trõpeta Teoso nitiriakori xõkini ìkapani.

9

Ãti Trõpeta Xõkiko

¹ Ininiã ãti Teoso nitiri xikarauata itrõpetaneẽ. Iuasaaki nitikari ãto iõriki iaxitikero katxakini itiximoni. Iõrikimoni osikaãka xavi aariko mamapotõkire irikoti tore ìkapani. ² Ininiã iõriki atoko inakari mataakari iua aariko. Eereka katxiãri kaiãopoko pokõka. Katxiãri tokori arikikosaaki atoko itxa. Eereka iaxiti, atokatxi pakini piãka itxiã xika. ³ Iposo atoko txõtixiri atoko inakari pokõka itxiã. Posotiiretxi isiãkana, ininiã kaxipiro itixi auakari posotiire atoko aua txõtixirimoni, kãkiti ioãkini ìkapani. ⁴ Ipaniãtaãkana katsotati imokakanina, apaka takari, aamina pakini imokakanina. Ipaniãtaãkana imisiritinina Teoso takaõtxikare iteẽtaã mauakini. ⁵ Kona isikaãkana posotiiretxi kãkiti okinina ìkapani. Siko kasiritinanira ninoa paniãtaãka imisiritinina ninoa. Imisiritarina kaxipiro ioãkini atoko. ⁶ Iuasaaki kãkiti nirekariko ipinini. Itxama, kona iposotarina ikoriinina. Initarina ipõkitxi, txamari iuasaaki ipõkitxi mitekapeka.

⁷ Iua txĩtxiri kavaro atoko itxana. Kavaro neenamatzí kamakani atoko itxana. Ikiiãna aua saporíeta atoko oro kamakori. Itoõna kãkiti toõ atoko itxana. ⁸ Ninoa iãko sito iãko atoko itxana. Itsiriãna ãkiti tsiriĩ atoko itxana. ⁹ Itorota ipatinina koana metao kamakori atoko. Imĩkitana ene kavaro itomaneri miteẽkani ene atoko. Mitekaĩ ene atoko itxana. ¹⁰ Ninoa xipi kaxipiro xipi atoko itxana. Oko aua ixipiãna. Ninoa posotari kamatsiitiniri kãkiti sĩko kasiriti. ¹¹ Ninoa auĩte aua. Iua Satanasi nitiri. Mitxi aariko mamapotõkire irikoti ãki auakari iua. Xoteo sãkireẽ iua uãka Apatõ itxaua. Kreko sãkireẽ iua uãka Aporioõ itxaua. Popĩkari sãkireẽ “Ikinipoko Xipokakari,” itxaua.

¹² Æti misirikaretxi napapeka. Txama aua-panikako apikomoni ipi misirikaretxi.

Æti Trõpetaxõkiko

¹³ Æti Teoso nitiri xikarauata itrõpetaneẽ. Iuasaaki seisi trõpetaxõkapeẽkaika. Teosomoni sikakori takikoãtaã oro kamakori aua ipi ipi pakini iko. Ikara Teoso apisatoõ. Nikenakotari iko takote auakari sãkirauatini. ¹⁴ Ininiã iua txari Teoso nitiri iua trõpetaxõkikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasiriti, ia õti, ia oara manapi ikapani. Ininiã ninoa sikakaãka kaiãopokori kãkiti okinina ikapani. Ininiã ipi ãti pakini kãkiti auiniãtaã auiritaãka ãtika okinina. ¹⁶ Æti sãpiretano ninoa sotatone kavaro nopini auakani tosẽtosi mirão aua. Kaiãopokori.

17 Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana pōkamarari xamina tirinakari atoko itxa. Apanakini poporeri. Apanakini posētakari ēxópiri atoko. Ikiina ākiti kii atoko. Inamaāna ipokīka xamina tirika, katxiāri, ēxópiri pakini. 18 Ikara xamina tirinakari, ikara katxiāri, ikara ēxópiri pakini inamaāna pokīkakari, okari kaiāopokori kākiti itixi auakani. Ininiā ipi āti pakini kākiti auiniātaā ninoa okari ātika. 19 Kavaro posotiire inamaā, ixipiā pakini aua. Ninoa xipi imini atoko itxa. Ixipiāna aua ito kiiri. Ninoa kii misiritari kākiti.

20 Ininiā itomane kākiti koriā ia misirikari xika. Iuaritika kākiti mokakoni maerekati kamakani !inirekari itakanapinirina imaerekani. Ninoa kapotoreēkapanikaua Satanasi nitiriakorimoni. Ikamapanikarina ninoa amanaākiti. Iteosonetari aamina kamakori, oro kamakori, pirata kamakori, pirōsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itīpokotinina. 21 Ninoa kākiti okapanikari apanakini. Ikamapanikarina mīiti parīka. Isirīkapanikana apanakinikata. Iītirīkapanikarina apanakini kākiti tii. Kona inirekarina maerekati itakanapinina.

10

Aātsopa Axapitiri Iapirikakori

1 Iuasaaki natamatari Teoso nitiri iaxitikiri katxakini īkorapokoritimoni. Kataparari iua. Iua

katxiãri iaxitikiri ãki. Katxiãri imãka atoko itxa. Kisi ikii nopini aua. Itoõ atokatxi atoko itxa. Itapike aãtsota tirinakari atoko itxa. ² Imaïkanãtari aãtsopa iapirikakori axapitiri. Iuakoã aãtsopa ikatamẽka. Itakari ikiti ikikomunikiri potxoari uiniti nopini. Isanaremonikiri ikiti itakari imiriĩ. ³ Akiripoakata ãkiti atoko. Iuasaaki setxi iokaamori kenakotaãka. ⁴ Iuasaaki niõkatsopaaritari ninoa setxi iokaamori sãkire. Txamari nikenakotari ãti iaxitikiri sãkire. Itxano:

—Kona piõkatsopatapiri ninoa setxi iokaamori sãkire —itxa iaxitikiri.

Aãtsopa Axapitiri Nikiko

⁵ Iuasaaki Teoso nitiri aua ãti ikiti imiriĩ. Potxoari uiniti nopini ãti ikiti aua. Iua õtanõkari iuako iaxiti. ⁶ Iuasaaki itxa:

—Uatxa nisãpiretakiti Teoso ãtipirika auakari sãkire. Ikamari ikinika iaxiti, iaxiti auakani pakini. Ikamari ikinika ãkorapokoriti, ãkorapokoriti auakani pakini. Ikamari potxoari uiniti, ikinika iua ãki auakani pakini. Teoso misiritinina maerekati kamakani ! okananiikari apokini.

⁷ Apikomoni ãti trõpeta xikarauatapanika. Iuasaaki kitxakapirika Teoso kipatakiti oerekaãkako. Teoso sãpiretakiti initiriakori ãkorapokoritimoni, isãkire sãpiretakanimoni paítiki oerekaãkako —itxa Teoso nitiri.

⁸ Eereka iuaïkana nikenakotari iaxitikiri sãkirauatini:

—Pisa. Papariko aãtsopa iapirikakori, Teoso nitiri uakoã auakari. Iua ãti ikiti imiriĩ, ãti ikiti potxoari uiniti pakini aua kititakari.

⁹ Ininiã nisa iuamoni, ininiã nitxari iua:

—Pisikano ere aãtsopa iapirikakari.

Iuasaaki itxano:

—Papakapariko, nika pitxari ia aãtsopa. Pitikakoã kapixiriko ia pinikakiti, iuaritika pinamaã potxoariko. Mapa atoko itxako —itxano nota.

¹⁰ Ininiã nimaĩkari ĩkora aãtsopa, nika nitxari. Ninamaã potxoari. Mapa atoko itxa. Txamari nitikakoã kapixiri iua aãtsopa ninikakiti. ¹¹ Iposo atoko isãpiretano:

—Iuaĩkana pisãpiretariko apikomoni Teoso sãkire, kaiãopokori kãkitimoni, kaiãopokori ãti uãkamoni, kaiãopokori ãti uãka sãkire sãkiretakanimoni, kaiãopokori auĩtetxiakorimoni pakini pisãpiretariko nisãkire —itxano.

11

Ipi Teoso Sãkire Sãpiretakani

¹ Aãke niaõrauatiini ĩkapani nisikaãka. Iuasaaki Teoso nitiri txano:

—Pisa. Piaõtariko Teoso misãkiretiko aikoti. Piaõtariko Teosomoni sikakori takikoãtaã. Piaõtana Teoso misãkiretakani iuaã auakani. ² Kona piaõtapiri Teoso misãkiretiko aikoti pirikere, kotxi Xoteo minakaniuua apotiitiniãtaãua iuaã. Iuaã ninoa ĩkapani. Ninoa misiritariko Teoso sitatxine koarëta toisi kasiriti. Ikara Teoso sitatxine, Xerosareẽ inakori. ³ Nisikaposotiiretanako ipi kiki. Teoso sãkire sãpiretakani ninoa. Ninoa ieretakariko sako mata. (Sako mata kãkiti ieretakasaaki oerekari imatinaniuatini.) Ininiã mio tosëtosì sesëta õti pakini ninoa sãpiretariko nisãkire.

⁴ Ninoa ipi oriva mina atoko itxana. Apaka ipi tirikapi topãkini atoko itxana. Ikini itixiti auakani

auñte apisatoõ, Teoso apisatoõ ninoa aua. ⁵ Kãkiti nirekasaakiri imisiritinina ninoa, iuasaaki xamina tirinakari pokïka inamaãna. Ininiã iuasaaki imokaiakarini xipope. Kãkiti nirekasaakiri imisiritinina, ikara atoko itxa okikona. ⁶ Teoso sãkire isãpiretakasaakina, iposotarina iaxiti itotini. Ininiã iuasaaki ãparaã kona ikipaika ïkorapokoriti. Ninoa posotari ãparaã arëkatxi inïkitakini. Iposotarina itxïkitakiniri ikini sereti maerekati apokini ïkorapokoriti auakanimoni. Inirekasaakina, ninoa posotari ikara ikinika ikaminina.

⁷ Teoso sãkire isãpiretinina xipoka atoko, monõkori aariko mamapotõkire irikoti ãki potoriãkari pokïka. Iuasaaki iua kamari neenamtxi ninoa ipi Teoso sãkire sãpiretakanikata. Eereka iua okapena ninoa. ⁸ Ininiã ninoa ïto sirïkako kimaporiãtaã, mitari sitatxitiã. Iua sitatxitiã Apiananiri tokakitaãka aamina ïpiriãmitakari nopini. Iua sitatxi akiriuãkataãka Sotoma, Exito pakini, kotxi Sotoma, Exito pakini atoko itxa Xerosareë. ⁹ Ininiã iuaã ikini kãkiti, ikini inirimane, ikinimane ãti uãka sãkire sãkiretakani, ikini ãti uãka atamatanako ninoa ïto kimaporiãtaã. Iuaã ikaikotanako ipi õti, ãti õti, ipixini õti pakini. Kãkiti kona auiritari ikatikona. ¹⁰ Ininiã ikini kãkiti atamatariko ninoa koriãkani ïto. Ininiãkara ikinimane enenïkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ïkapani. Ninoa kamariko ikara atoko inakari, kotxi ninoamoni naia ipi Teoso sãkire sãpiretakani misiritana ninoa. Ininiã ninoa enenïka, kotxi Teoso sãkire sãpiretakani koriãpeka.

¹¹ Iuaritika ipi õti, ãti õti, ipixini õti pakini na-

paka atoko, Teoso txīkitakana ninoa iuaīkana auāki ininina īkapani. Ōkitakauana. Iuasaaki kākiti atamatana, ininiā ipīkarauatana. ¹² Ikara eereka ninoa ipi Teoso sākire sāpiretakani kenakotari iaxitikiri sākirauatini:

—Uaimoni hina.

Ininiā ninoa kanīka katxiāriā Teoso tixinemoni. Ninoa mokaiakariakori itikana ninoa kanīkaāpotini Teoso tixinemoni. ¹³ Iuasaakipeka itixi iteene iakeēkata. Ininiā iua sitatxitiā kaiāopokori aapokotxi irika. Tesi aapokotxi auiniātaā ātika irika. Iuasaaki setxi mio kākiti ipina. Kākiti auapanika inakani pīkarauata. Iuasaaki itxana:

—Teoso iaxiti auakari apiatakari itxaua — itxana.

¹⁴ Īkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paītiki āti misirikaretxi apiari apokapanikako.

Trōpetā Imapotōkirekiri Xōkiko

¹⁵ Iuasaaki Teoso nitiri mapotōkirekiri xikarauata itrōpetaneē. Itomane iaxiti auakani iteene akiritari:

—Ikini itixiti auakani auīte itxapekaua aāuīte Teoso, Kristo pakini. Ātipirika iua ikinimane auīte itxauako —itxana.

¹⁶ Iuasaaki vītxi koatro totiakori Teoso topākiniātaā apisatoō topākakani pamaka Teoso apisatoō. Itxana:

¹⁷ “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirīka aua. Katana ātipirika pauapika.

Erekapitikai, kotxi kaposotiirei, ininiã
ãtipirika ate auĩte pitxaua.

18 Kãkiti ikini itixiti auakani omanãkarauata,
Uatxa piteka omanãkarauatini manapi
apope. Uatxa apokapeka ipĩkani
misiritiko mereĩko õti. Pinitiriakori,
pisãkire sãpiretakani, apaka pinakitiakori
pite paxitakani pakini ĩkitxitiko õti
apokapeka. Ikinimane kãkiti poiãorini,
kãkiti kaposotiirerini pakini apakapariko
ikamakitina ĩki. Iuasaaki pixipokariko
ĩkorapokoriti xipokakani,” itxana.

19 Eereka natamatari iuaã Teoso tixineẽ
imisãkiretiko aikoti tore imataakaãka. Iua aiko
ãki natamatari Teoso kaixane, iua apokiniãtaã.
Iuasaaki natamatari ito mẽkokari. Nikenakotari
ito okaratxirari, ito iokaamori pakini. Itixi
iakeẽkata. Ito ãparaã kai soro katxĩkareri atoko
katxaka.

12

Imini Mitapoari, Sito Pakini

1 Eereka nitaponeẽ nitikoka. “Kipa atxiĩti?”
nitxa nãkixinireẽ. “Natokopa itxa Teoso oerekiniri
kãkiti?” Kotxi sito tokiã Teoso tixine. Atokatxi
iotximere iakirokaro oa omãka atoko inakari.
Kasiri aua okiti patapi. Okiiã aua auĩtetxi
saporietane, tosi iõriki kamakori. 2 Oa kamixiro.
Oa akiripoakata oãtatsiirauatini xika, kotxi
kaiamapeka amarini oãuãkitakini.

3 Eereka iuaĩkana nitikoka, kotxi imini
mitapoari tokiã Teoso tixineẽ. Põkamarari. Iua
setxi ikii aua. Aua tesi iko. Ikininape ikii
aua auĩtetxi saporietane. 4 Ixipiã ikosekari

kaiãopokori iõriki iaxitikero, uai ixiti oka itxaro iõriki. Itima oa sito apisatoõ, kotxi paõtiki amarini oãuãkitaka. Inirekari iixirãkiniri amarini, amarini auakasaaki. ⁵ Eereka oa sito auãkitakari amarini, kiki. Oa sito ãkiri aneẽkasaaki ikini itixiti auakani auĩte itxauako. Auĩtetxi kataparari itxauako iua amarini. Auakasaaki, imini !ixirãkari amarini. Patimari maĩkiko iua amarini. Teoso auinimoni anikaãka amarini. Iuaãtaã Teoso topãkanãta auĩtetxi itopanere nopini. ⁶ Oa sito miteka ãparaã makipakaniãtaã. Teoso oerekatapekari iuaã okaikotini ãkapani. Iuaã oinĩkataãkako mio tosõtosi sesẽta õti. Ipi anokanani, ãti anokanani ipixini pakini itxa.

⁷ Eereka aua neenamatzxi Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸ Teoso nitiriakori tapara apiata, ininiã imini initiriakorikata !auiritaãkaika Teoso tixine ikaikotinina. ⁹ Iua imini mitapoari iokanataãka maparamoni. Iua imini kitxakapirĩkaripekara. Iua Txiapo inakori. Iua Satanasi inakori. Iua misirienetari kãkiti ikini itixiti auakani. Maparamoni iokanatikosaaki, iua, initiriakori pakini okaãkana uai ãkorapokoritimoni.

¹⁰ Eereka nikenakotari Teoso tixinekiri sãkire kataparakieneri:

—Kãkiti maerekani makatxakiko apokapeka uatxa. Teoso makatxakari kãkiti maerekani. Uatxa Kristo posotiire oerekaãka. Uatxa oerekari ikinimane auĩte ininiua. Teoso mereẽkiti ikinimane auĩte itxaua uatxa, kotxi aĩtariakori kamapiretakari iokanatapeẽkaika mapara. ! Ikaikotaika Teoso tixine. Mitxi ikamapiretari

aĩtariakori Teoso apisatoõ. Pokamara, ĩkanõka ikamapiretana. ¹¹ Aĩtariakori iokanatapekari Satanasi isini. Ninoa posotari iokanatiniri Satanasi, kotxi Teoso Soti Auĩtene ipina ninoa ĩkapani. Iarēka xiketa ninoa ĩkapani. Ninoa posotari Satanasi iokanatinina, kotxi ninoa sãpiretari atão inakari Teoso sãkire. Ninoa iposope okikona Teoso ĩkapani. ¹² Hĩte Teoso tixine auakani hĩpoxokoniuatako. Txamari hĩte itixi auakani, potxoari uiniti auakani, erepaniko, kotxi Satanasi apopeka ereẽ hĩte sauaki. Iua iteene naiataua, kotxi imarotari paĩtiki Teoso ! auiritaikari iua maerekati apikomoni ikamini —itxa iua Teoso tixinekiri sãpirena.

¹³ Uai itiximoni okikosaaki, imini mitapoari asikatikinitaro oa sito amarini auãkitakakaro okiniro ĩkapani. ¹⁴ Oa osikaãka ipi mĩkitatxi kokoi mitari mĩkita, oãraini ĩkapani. Oa araã ãparaã makipakanimoni. Teoso oerekinimoni osa. Iuaã Teoso nĩkataro oa ipi anokanani, ãti anokanani, ipixini pakini. Iuaã imini mitapoari ! iposotari oamoni apokini. ¹⁵ Oa araãkasaaki, imini mitapoari koporikaãtari ãparaã inamaãkiri oa tikini. Uini atoko itxĩkitakari ãparaã, oa sito axãpoãtini ĩkapani. ¹⁶ Kipatxi ! auiritari ãparaã sini oamoni. Ixoreka. Ixorekasaaki, ikinika ãparaã imini namaãkiri kipatxi ãki isa. ¹⁷ Ininiã imini iteene omanataro oa sito. Ininiã asikatikinitana apanakini oa anaakori inaiatinina ĩkapani. Kãkiti Teoso paniãtakiti kamakani oa anaakori itxauana. Kãkiti Xesosi Kristo sãkire auĩãkani oa anaakori itxauana.

13

Monōkori Potxoari Uiniti Pokīkaātakari

¹ Ininiā nitaponeē nitima ikipatxite nopini. Iuaā nitikari monōkori potxoari uiniti pokīkaātini, kanīkiīta itxa. Iuamoni auari iko tesi pakini. Apaka ikii setxi aua. Ikinika iko aua auītetxi saporietane. Ikini ikii aua uākatxi Teoso misākirepiretakari. ² Iua monōkori nitikakiti ākiti kaiōkari atoko itxa iīto. Ikiti oso kiti atoko itxa. Inama ākiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiā iua auītetxi itxaua. Imini auītetxi ininiua atoko itxa. Imini txīkitakari iua potxoari uinitikiri sākire kaposotiire inini, isākire kākiti auikini īkapani. ³ Nota atamatarari ikiiniri. Ikii āti ipīpe ikaro mitari xika. Eereka ikaro tximōka. Iuaīkana auāki itxa ikii ipinakari. Kākiti ikini itixitikini atamatakasaakiri, itsorīkaātana. Ininiā auikarina isākire. Ikamarina iua nireēkiti. ⁴ Ikinimane auikari imini mitapoari sākire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sākire. Ninoa teosonetari iua apaka. Ninoa sākire:

—Āti kaposotiireri potxoari uiniti pokīkaātakari atoko inakari !auari. Kākiti !iposotari inaiatiniri iua —itxana.

⁵ Iua potxoari uinitikiri auiritaāka isāpiretiniri maerekati sākiretxiti. Imisākirepiretari Teoso. Auiritaāka auītetxi ininiua koarēta toisi pakini kasiriti. ⁶ Iua misākirepiretari Teoso. Imisākirepiretari Teoso uāka. Imisākirepiretari Teoso auiniātaā. Imisākirepiretari Teoso tixine

auakani. ⁷ Iua auiritaãka inaiatiniri kãkiti Teoso nakitiakori. Apaka auiritaãka ninoa imaĩkini. Auiritaãka kãkiti ikini uãkati auĩte ininiua, ikini itixiti auakani auĩte ininiua, ikini kãkiti sãkire sãkiretakani auĩte ininiua. Ikinimane auĩtetari iua maerekati kamakari. ⁸ Ikini itixiti auakani, Teoso nakitiakori minakaniua, auikariko iua potxoari uiniti pokĩkaãtakari sãkire, kotxi iteosonetarina iua. Itixi kamiko apisapanika ninoa uãka ! iõkataãka Soti Auĩte okakori aãtsopateẽ. Iua aãtsopaã auauãkatakani auapikako Teosokata mapĩkaninoka ininina.

⁹ Hĩte, ia atatsopatakani kakenakokii, ininiã hĩkenakotariko nisãkire. ¹⁰ Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã hĩte Teoso nakiti inakaniua himĩteenekariko himisiritiko. Kona hĩtakanapapiri Teoso kimapore. Ætipirika hĩkamariko Teoso nirekakiti.

Monõkori Itixiãkiri

¹¹ Eereka nota itikari ãti monõkori. Itixiã ipokĩka. Aua ipi iko. Soti auĩte ãkiri iko atoko itxa, iuaritika isãkirauata imini sãkire atokokana. ¹² Potxoari uiniti pokĩkaãtakari nitiri itxaua iua itixiã pokĩkakari. Potxoari uinitikiri sikaposotiiretari iua, ininiã isari ikini itixitimoni. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. ¹³ Iua itixiã pokĩkakari kamari posotiiretxi mitxi mimarotakoti. Ipaniãtari xamina tirinakari iaxiti auakari ãkorapokoriti apokini ikinimane atamatiniri ãkapani. ¹⁴ Iua potxoari uinitikiri

auritari itixiākiri kaminiri posotiiretxi iua
 ĩkapani. Posotiiretxi xika itixiākiri misirienetari
 ikinimane itixiā auakani. Itxĩkitakari kākiti
 kaminiri potxoari uinitikiri ĩto atoko inakari
 kai kamakori. Ikara atoko ipaxitarina potxoari
 uinitikiri, kotxi ikarotaāka iouata mitariā,
 iuaritika iuaĩkana auapanika ikii. ¹⁵ Itixiā
 pokĩkakari auiritaāka itxĩkitakiniri potxoari
 uiniti pokĩkaātakari atoko inakari kai kamakori
 kosekasinaniretiniua, ininiā iua kai kamakori
 posotari isākirauatini kākitikata. Ipaniātari kākiti
 okiko imanirekakanisaakiri iteosonetiniri iua.
¹⁶ Itixiā pokĩkakari paniātari ikinimane kākiti
 apakapiniri Satanasi takaōtxikare iuakoāna
 ikikomoni, minakaniā iteētaāna. Ipaniātari
 ikinimane kākiti auĩtetxi inakaniua, auĩtetxi
 minakaniua, katiini, matiini, nitiritxi, nitiritxi
 minakaniua pakini, apakapiniri Satanasi
 takaōtxikare. ¹⁷ Kākiti iua takaōtxikari mauakiniti
 ! auiritaāka iamotiitinina. ! Auiritaākana
 ivētxirauatinina. Iua takaōtxikari potxoari uinitikiri
 uāka. Iuāka mauakanisaaki, aua nómero iua nakiti.
¹⁸ Kimarore hĩtxako, ikara himarotini ĩkapani.
 Kimarore hininiā himarotari potxoari uinitikiri
 nomerone kiki uāka itxa. Nómero 666.

14

Soti Auĩte Sēto Koarēta Koatro Mio Kākitikata

¹ Eereka nionakaāta nitaponeē. Natamatari
 Soti Auĩte. Ōtanoxiratarari nopini auanāta. Ixirata
 uāka Siāo inaāka. Kākiti sēto koarēta koatro mio
 pakini aua iuakata. Kaiāopokori kākiti. Iteētaāna
 Soti Auĩte iri uāka iōkatsopatapeēkaika. ² Eereka
 nikenakotari ninoa xikarauatini. Itorōkani ene

atoko itxa, kotxi ama eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. ³ Ninoa kãkiti sêto koarêta koatro mio pakini tima auîtetxi topanere apisatoõ, okîtxinoka xãpokaîtotakini ipi ipi pakini apisatoõ. Totiakori vîtxi koatro pakini apisatoõ apaka itimana. Ninoa sêto koarêta koatro mio xikaretari xikari amaneri. Apanakini ! imaîkari iua xikari amaneri. Ninoa sêto koarêta koatro mio îkorapokoriti Teoso amotakini, ninoanoka posotari ixikaretiniri iua amaneri xikariti. ⁴ Ninoa kiki ! isirîkana sitokata. ! Auiritarina iîtona kaminiri maerekati. Soti Auîte sinimoni ninoa apaka sa. Îkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auîtene pakinimoni. ⁵ ! Ikamarina maxikatîika isãkirena. Atão inakarínoka isãpiretana. ! Ikerokarina isãkirena Teoso iauîtena apisatoõ.

Ipi ãti Pakini Teoso Nitiri Sãkire

⁶ Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. ãti uãka sãkire ipinimoni. ãti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni. ⁷ Itapasãkireritika itxari:

—Hîpîkariko Teoso. Hîsãpiretariko, iua Api-ananiri ininiua. Apokapeka kãkiti maerekati kamakani misiritiko ôti. Hîteosonetariko Teoso, kotxi iua kamari iaxiti, îkoraxiti, potxoari uiniti, sôtoãri pakini —itxa iua Teoso nitiri araãkari sãkire.

⁸ Iua sãkirauataka atoko, ãti Teoso nitiri txari:

—Papirónia sitatxiti xipokapeka. Iuaã auakani kaposotiirerini, iuaritika ixipokapena. Papirónia sitatxiti auakani paniãtari imakinika itixi auakani maerekati ikaminina, maerekati ãtotxi nireẽkiti. Ininiã ninoa kamari maerekati Papirónia auakani paniãtakiti.

⁹ Ninoa Teoso nitiriakori ipi sãkirauataka atoko, ãti Teoso nitiri txari itaparasãkireritika:

—Teoso misiritanako kãkiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kãkiti Satanasi takaõtxikare iteẽtaãna takakani, iuakoãna takakani. ¹⁰ Kãkiti iua atoko inakani misiritaãkako, kotxi Teoso iteene omanãkarauata maerekati ninoa kamakiti xika. Teoso misiritanako ninoa, ininiã atatsiirauatana xamina tiri-nakariã. Êxõpiri arikanako ninoa. Teoso nitiriakori erekarini, itixine auakani, Teoso Soti Auĩtene pakini itikariko ikara kãkiti misiritiko.

¹¹ Iua xamina txĩkitakari kãkiti atatsiirauatini. Iua xamina tirinapikako. !Ixipoka. Itirinapika. Itxiãkapika. Ninoa misiritiko !iotoka. Pokamara, ãkanõka auapika ninoa misiritiko. Kãkiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuãka ãtoãna auãĩtotakini misiritaãkako ikara atoko —ĩtxa iua Teoso nitiri sãkire.

¹² Ininiã hĩte Teoso nakitiakori, hĩte ipaniãtakiti kĩpitakani, hĩte Xesosi nireẽkiti ãtipirika kamakani, kataparaxinire hĩtxako. Himĩteenekariko kãkiti misiritini.

¹³ Eereka nikenakotari Teoso tixine auakari sãkire. Itxano:

—Nisãpiretakiti piõkatsopata. Kãkiti ipĩkasaaki Apiananiri ìkapani iparĩkauatakasaaki, Teoso sikari erekari iuamoni.

Iua Erekari Matamatakoti txari:

—Ia atão. Mitxi pasãpaniri Teoso parĩka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴ Eereka nitaponeẽ nionakaãta iaxiti. Iuasaaki natamatari katxiãri kasarori iuaã. Aĩtari iaxitikiri atoko inakari topãka iua katxiãri nopini. Ikiĩã aua auĩtetxi saporĩẽtane oro kamakori. Iuakoã saasara ãtoião aua. Pauanaro. ¹⁵ Iposo atoko ãti Teoso nitiri pokĩka Teoso aapoko. Iua itaparasãkireritika akiritari iua katxiãri nopini topãkakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶ Ininiã iua katxiãri nopini topãkakari isaasarateẽ isauakari ikini itixiti nopini auakari. Amari takari imakinika.

¹⁷ Iposo atoko nitikari ãti Teoso nitiri pokĩka Teoso aapoko Teoso tixineẽ. Iuamoni apaka aua saasara ãtoião iuakoã. Pauanaro.

¹⁸ Iuaĩkana ãti Teoso nitiri apoka. Teosomoni sikakori takikoãtaã ipotorika iua. Inĩkatari xamina tirinakari iuaã. Iua itaparasãkireritika akiritari Teoso nitiri saasara auakiti:

—Pimaĩkaroko pisaasarate. Pimakatxakaroko ova ikini itixitikero, kotxi ova oionapeka —itxa.

¹⁹ Ininiã Teoso nitiri isaasarateẽ isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari ãki. Okatsonakaãka. Teoso omanãkare iua ova iopetiko

atoko itxa, kotxi Teoso iteene omanãkarauata kãkiti maerekani xika. ²⁰ Ova ori kãkiti kitiã iopetikoãtaã sitatxi mapotõkire. Txamari na ovapeñi ikara atoko itxa. Arẽkatxiãra ikara atoko itxa. Iua arẽkatxi uini panaã atoko itxa. Tresëtosi kirómetro arẽkatxi aua. Arẽkatxi ñpanaã kavaro namaãpeka apoka arẽkatxi. Æti metro ipixini ñpanaã arẽkatxi.

15

Teoso Misirikare Mĩkani Setxi

¹ Eereka nitaponeẽ nitikoka iuaĩkana.

—Kipa atxiĩti? —nitxa iuaĩkana nãkixinireẽ, kotxi natamatari Teoso nitiriakori setxi itixineẽ.

Ninoa minari misirikaretxi setxi pakini kãkitimoni. Apikomoni misirikaretxi ! auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

² Eereka natamatari ipoa atoko inakari. Ætakaãri, xamina tirinakarikata koketakori atoko itxa ipoa. Kãkiti tima ipoa ñtinikata. Ninoa iokanatapekari Satanasi sini, kotxi ! ikamarina iua potxoari uinitikiri paniãtakiti. Iua potxoari uinitikiri atoko inakari kai kamakori paniãtakiti ! ikamana. ! Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti. ³ Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auĩtene xikare. Ia ixikaretana. Itxana:

“Teoso Apiananiri, ikini posotiiretxi auakitii pite. Peerekari piparĩka. Pite kaposoti-ireri. Pite atãonani pikamakiti. Ikini uãkati auĩte pitxaua pite.

⁴ Ikinimane paxitaiko pite ipĩkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka ! auari maerekati. Kãkiti ikini uãkati apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵ Eereka natamatari Teoso aapoko ãki. Natamatari iua auiniãtaã. ⁶ Iposo atoko ninoa Teoso nitiriakori setxi, misirikaretxi setxi mĩkani, pokĩka Teoso aapoko. Ninoa mãka katsopiri, pomẽkoriri. Ninoamoni aua oro kamakori. Itinimaĩ nopini inapa. ⁷ Ninoa ipi ipi pakini okĩtxinoka xãpokaĩtotakini iuaã aua. Okĩtxinoka xãpokaĩtotakiti sikari iãtatxi setxi pakini oro kamakori ninoa setxi Teoso nitiriakorimoni. Teoso auapininiika inakari xãpokakapekari iua setxi pakini iãtatxi omanãkareẽ. ⁸ Teoso iotximere xãpoka iua aapoko ãki. Katxiãri kasarori atoko itxa. Iuasaaki kãkiti ! auiritaãka Teoso aapoko ãroini, ninoa Teoso nitiriakori, misirikaretxi mĩkani setxi pakini, misiritakasaakina kãkiti.

16

Iãtatxi Teoso Omanãkare Auakiti

¹ Eereka nikenakotari Teoso aapoko ãki auakari sãkire. Itaparakieneritika imisãkiretana ninoa Teoso nitiriakori setxi. Itxana:

—Hĩsa. Hĩkitakari Teoso omanãkare iãtatxi ãki auakari itixi auakanimoni —itxa.

² Ininiã ninoa Teoso nitiriakori sari. Merepanika ãtika initiri kitakari iãtatxi ãkikiri itixi auakanimoni. Iuasaaki kimiti mitari, katsiiri,

apoka kākiti Satanasi takaõtxikare auakini ïtomoni. Potxoari uinitikiri atoko inakari kai kamakori teosonetakani ïtomoni apoka ikara atoko inakari amianari.

Ãti Iãtatxi

³ Iposo atoko ãtipekana Teoso nitiri kitakari iãtatxi ãkikiri potxoari uinitimoni. Iuasaaki ãparaã arẽkatxi itxapekaua. Kākiti ipĩkari arẽka atoko itxa iuasaaki. Ininiã ikinipoko potxoari uiniti auakani iuasaaki xipoka.

Ãti Iãtatxi

⁴ Iposo atoko ãtipekana Teoso nitiri kitakari iãtatxi ãkikiri uinimoni, sõtoãri pakinimoni. Iuasaaki ãparaã arẽkatxinoka itxapekaua.

⁵ Iuasaaki nikenakotari Teoso nitiri ãparaã nĩkatakari sãkire. Itxari Teosomoni:

—Pite maerekati makamakatii. ãtipirika auakarii pite. Atão pikamakiti pimisiritinina maerekati kamakani ïkora atoko. ⁶ Kotxi ninoa okari kākiti pite nakitiakori. Okarina pisãkire sãpiretakani. Ninoa oxiketari ninoa arẽka. Ininiã uatxa pite sikana arẽkatxi iãtinina. Atão imisiritikona kotxi maerekati ikamana —itxa Teoso nitiri.

⁷ Iposo atoko nikenakotari ãti sãkire. Teosomoni sikakori takikoãtaã auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atão inakarinoka pikama —itxa.

Ãti Iãtatxi

⁸ Eereka ãtipekana Teoso nitiri kitakari iãtatxi ãkikiri atokatximoni. Iuasaaki atokatxi apiata

patakata. Auiritaãka kãkiti arikini itaparapatakaã.
⁹ Ininiã kãkiti arikaãka atokatxi patakaã. Iuaritika !inirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaã akiritari Teoso uãka.

Ãti Iãtatxi

¹⁰ Ininiã ipi ipi pakini Teoso nitiriakori kitakapekari iãtatxi ãkikiri itiximoni. Eereka iuaĩkana ãti Teoso nitiri kitakari iãtatxi ãkikiri auĩtetxi topaneremoni iua potxoari uiniti pokĩkaãtakari topaneremoni. Iuasaakipeka iua potxoari uinitikiri auĩtetxi ininiãtaãua patimari ipiãkini. Kãkiti iuaãtaã auakani akatsaninitaua itsii xika. ¹¹ Iuaritika !inirekarina maerekati ikamakitina itakanapinina. Imisãkirepiretarina Teoso iaxiti apiko nopinixiti auakari, atatsiirena xika, kimiti xika.

Ãti Iãtatxi

¹² Eereka iuaĩkana Teoso nitiri ãti kitakari iãtatxi ãkikiri mitari uinitimoni Eoparatxi inakorimoni. Iuasaaki uini auaã. Isonãka. Kimapori itxaua, auĩtetxiakori atokatxi pokĩkinimoni ĩkani inapinina ĩkapani. ¹³ Iposo atoko nitikari maerekani mata-matakoni ipi ãti pakini. Atiniro atoko itxana. Ãto pokĩka mitapoari imini namaã. Ãto pokĩka iua potxoari uiniti pokĩkaãtakari namaã. Ãto pokĩka iua itixi pokĩkakari namaã. Iua itixi pokĩkakari iua Satanasi sãkire sãpiretakari itxaua. Na atãoene isãkire. Poxirari ikama. ¹⁴ Ninoa maerekani mata-matakoni ipi ãti pakini Satanasi nitiriakori. Ninoa kamari posotiiretxi. Isana auĩtetxiakorimoni, ikini

itixiti auakanimoni. Akiritana kãkiti apotiitiniua ineenamauatinina ìkapani. Teoso kaposotiireri naitatanako ninoa itixi xipokini õtisaaki.

¹⁵ Hĩte ia atatsopatakanii, Apiananiri txai hĩte:

—Erepaniko. Napokako kiĩtiriri apokini atoko, kãkiti mimarotakinitipanika. Napokasaaki ereẽ, pikoatiniã, kamãka pininiã, pipoxokoniuata. Ìkara atoko pininiã, kona kasarai ikinimane apisatoõ pisini, ininiã kona kapẽtai —itxa Apiananiri sãkire.

¹⁶ Eereka ninoa ipi ãti pakini Satanasi nitiriakori maerekani matamatakoni, apotiitari auĩtetxiakori Amaketõ inakoriãtaã. Iuaãtaã akiritaãka Amaketõ Xoteo sãkireẽ.

Imapotõkire Iãtatxi

¹⁷ Ninoa setxi Teoso nitiriakori, seisi kitakapekari iãtatxi ãkikiri. Ætinoka ! ikitakapanikari. Iuasaakiika iua kitakari iãtatxi ãkikiri ìtimamoni. Iuasaaki nikenakotari auĩtetxi itopanereãtaã auakari sãkire:

—Ixipokapeka —itxa itaparakieneritika.

¹⁸ Iposo atoko iotxira mẽkoãkata. Ikarokirauata. Pataparaeneri. Itixi iakeẽkata. Mitxi ! auari itixi iakeẽkatini ìkora atoko inakari. Iuasaakiikarako apiatako. ¹⁹ Iua sitatxi apiari Papirónia inakori xoreka. Ipiakata ixoreka, ininiã ipi ãti pakini sitatxiti atoko itxaua. Ikini itixiti auakari sitatxi xipokaãka iuasaaki. Teoso ! imaxinĩkaretari Papirónia sitatxiti auakani kamakiti, ininiã iteene imisiritana ninoa, kotxi iteene omanãkarauata imaerekanina xika. ²⁰ Iuasaaki ikini ipokomiriĩ !auaika. Õtanoxiratari ikinipoko xipoka iuasaaki.

²¹ Katxĩkareri iaxiti auakari, kai mitari atoko inakari, katxaka itiximoni. Apanakini kai minani koarēta sĩko kiro. Iua irika kākiti nopini. Ikara katxakakari pamonõkonipaniri. Iua xika kākiti iteene misākirepiretari Teoso.

17

Sito Potxoari Uinitikiri Nopini Topākakaro

¹ Ninoa Teoso nitiriakori setxi pakini iātatxi setxi auakini, seisi kaikota. Ātika ina notamoni. Itxano nota:

—Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topākanāta uini itori nopini. Iuaã auakani misiritiko noerekaiko pite. ² Auĩtetxiakori ikini itixiti auakani kamari maerekati iua sitatxiti auakanikata isirĩkinina. Iua sitatxi auakani txĩkitakari kākiti ikini itixiti auakani maerekati ikaminina. Kapoãroã poãtakari nirekini atokokana, ninoa nirekari iua maerekati iua sitatxiti auakani kamakiti —itxa notamoni.

³ Eereka iua Erekari Matamatakoti paniātano iua Teoso nitirikata nisini. Iua Teoso nitiri anikano āparaã makipakaniātaã. Iuaã natamataro sito topākanāta iua potxoari uinitikiri nopini. Pōkamaraitori iua. Iĩtoã aua iōkatakori kaiãopokori Teoso imisākirepiretini iōka. Ikii setxi aua. Iko tesi aua. ⁴ Oa sito māka pomamari ipixini. Pōkamarari itxa omāka. Pakaroneri omāka. Oĩtoã aua oro, pérora, kai soro pomēkoriri pakini aua. Omaĩkari iākoanatxi oro kamakori. Iua iākoanatxi āki aua maerekati okamakiti itxiko atoko inakari. Maerekati oĩto kamakiti ikara atoko itxa. ⁵ Oteētaã aua sākiretxi iōkatakori. Itxari: “! Kimarotikori.

Kanokareroakoro inoro itxaua Papirónia sitatxiti miramaneri. Maerekati kamakani inoro itxaua Papirónia.”⁶ Nitikaro oa sito opoātini, Teoso naki-tiakori arēka oātini xika. Xesosi sākire auikinina xika, okaākana. Natamatakasaakiro nitikoka.

—Kipa atxiīti? —nitxa.

⁷ Iua Teoso nitiri txano:

—Kininiāpa pitikoka? Nisāpiretaiko oa sito pirena. Apaka nisāpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisāpiretai, kotxi kona pimarotari.⁸ Iua potxoari uinitikiri patamatakiti mitxi aua, txamari uatxa !auaika. Iua eereka ipokīkapanikako aariko mamapotōkire irikotiā. Eereka anikaākako ixipokikomoni. Ikini itixiti auakani Teoso aātsopateē iuākana maiōkatakoni tikokako iua potxoari uinitikiri atamatakasaakinako. Itixi kamiko apisa iuākana !iōkatsopataāka Teoso aātsopateē. Iua aātsopaā iōkauākatakoninoka ātipirika auapikako Teosokata. Kākiti tikokako iua potxoari uinitikiri atamatakasaakina, kotxi mitxi auāki itxa, eereka !auaika, eereka iuaīkana auākipeka itxa.

⁹ —Ikara inakari pimarotini īkapani, iteene pim-ixinikariko. Kinirepa ikii setxi aua? Kotxi ōtanoxiratarari setxi apaka aua. Oa sito topākanāta iua ōtanoxiratarari nopini.¹⁰ Kinirepa ikii setxi aua? Kotxi auītetxiakori setxi apaka auako. Auītetxi !itxauka uana ninoa sīko. Ātinoka auītetxi txa-panikaua. Āti kona apokapanika. Iua apokasaaki mapaōtinoka auītetxi itxauako.¹¹ Iua potxoari uinitikiri mitxi auāki inakari, iposo atoko !auaika inakari, iua apokako. Iuara auītetxi txauako. Iua

mitxi apotiitaua ninoa setxi auñtetxiakorikata. Æti õti iua xipokaãkako.

¹²—Patamatari iko tesi pakini. Kinirepa iko tesi aua? Kotxi auñtetxi tesi aua. Ninoa auñtetxiakori kãkiti auñteakori !itxapanikauana. Ninoa sika-posotiiretaãkako auñtetxi ininiuana iua potxoari uinitikirikata. Ninoa auñtetxi itxauanako ãti oaranoka. ¹³ Ikininape ninoa tesi auñtetxiakori parĩkauata iua potxoari uinitikiri ïkapani. Iposoti-ireẽna, itaparaãna iparĩkauatana iua potxoari uinitikiri ïkapani. ¹⁴ Inaiatarinako Teoso Soti Auñtene. Teoso Soti Auñtene iokanatana ninoa isinina, kotxi iuanani Apiananiri itxaua. Auñtetxiakori auñte itxaua. Ætipirika iuakata sikani, iua akiritakini, imereẽkini, ãtipirika iua nireẽkiti kamakani, ninoa moianatari iua Soti Auñte ineenamauatini —itxa Teoso nitiri sãkire.

¹⁵ Iua Teoso nitiri apikomoni txari notamoni:

—Pite atamataro oa kanokarero topãkanãta kãuaãri nopini. Kinirepa kãuaãri nopini oãua? Kotxi iuaãtaã kãkitipokoni, ikini uãka, ikini itixiti auakani, ikini ãti uãka sãkire sãkiretakani pakini. Iua kãuaãri mitari atoko itxana. ¹⁶ Iua potxoari uinitikiri, ninoa tesi auñtetxiakori pakini omanataroko oa kanokarero. Ninoa makatxakariko ikinipoko oa nakiti. Imakatxakarinarako omãka. Kasarapeka otxako. Oxini inikanako. Ninoa xipokaroko oa xaminaã. ¹⁷ Teoso txĩkitakari Teoso nireẽkiti ikaminina, kotxi ninoa auñtetxiakori parĩkauata iua potxoari uinitikiri ïkapani Teoso nireẽkiti iaõka. Ininiã Teoso sãkire mitxi auakari auapeka. Isãkire iaõka ikamana. Ininiã ninoa nirekari iparĩkauatinina

iua potxoari uinitikiri ïkapani. Ininiã ninoa auñtetxiakori itxauana iua potxoari uinitikiri ïkapani.

¹⁸ —Oa sito kanokarero patamatakito kona atão sitoni. Sitatxi miramaneriã auakani oa sito kanokarero atoko itxana, kotxi iua sitatxiã auakani paniãtana ikini auñtetxiakori itixi auakani maerekati inireëkitina ikaminina.

18

Papirónia Sitatxiti Xipokini

¹ Ikara inaãka atoko nitikari ãti Teoso nitiri Teoso tixine auakari katxakaãpotini ïkorapokoriti Teoso tixine potoriãkari. Iua kaposotiireri. Iotximere iopinikari imakinika itixi. ² Iua sãkirauata itaparasãkireritika. Itxari:

—Ixipokapeka Papirónia sitatxiti miramaneri. !Auaika. Uatxa Satanasi nitiriakori aua iuaã. Ikini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. ³ Oa sito kanokarero atoko itxa iua sitatxi, kotxi iua sitatxi auakani txïkitakana ikini itixiti auakani maerekanitxi ninoa kamakiti iaõka ikaminina. Papirónia sitatxiti auakani kamari maerekati ïitona nireëkiti. Itixi auakani nirekari ikara maerekati ikaminina kapoãroã poãtakari nirekini atokokana. Auñtetxiakori ikini itixiti auakani kamari ikara maerekati Papirónia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirónia sitatxiti auakani amotari tiitxipokoni —itxa Teoso nitiri sãkire.

⁴ Eereka nikenakotari ãti Teoso tixine auakari sãkire. Itxari:

“Hĩte nota nakitiakori inakani takanapariko iua sitatxi. !Hĩkamapiri maerekati ninoakata. Ininiã !himisiritaãka ninoakata.

⁵ Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶ Himisiritanako ninoa. Hĩte imisiritinina atokokana, hĩte misiritana ninoa. Ipikata himisiritanako ninoa, ninoa maerekani xika. Ninoa misiritapekari apanakini, ininiã ia imisirikarena xika ipikata himisiritanako ninoa.

⁷ Hĩtxikitakanako ninoa atatsiirauatinina. Hĩtxikitakanako ninoa maerekaxiniretinoka ininina. Ikara atoko ninoamoni hĩkaminiã, atãopitikara hĩkamakiti, kotxi iteene iuikauana ninoa. Itomaneri itiina, ininiã ninoa iarinouata. Ninoa sãkire: ‘Ate uai topãkanãta, kotxi auĩtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,’ itxana ãkixinireẽna.

⁸ Ikara isãkirena xika ãti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iusaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,”

itxa iua Teoso tixine auakari sãkire.

Kãkiti Txiapatini Sitatxi Xipokini Xika

⁹ Auñtetxiakori ikini itixiti auakani, Papirónia sitatxiti auakanikata sirĩkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatanako. Ninoa auñtetxiakori txiapata iua sitatxi arikasaaki, xamina txiã itikasaakina. ¹⁰ Õtakoxiti itimana, kotxi ipĩkarina sitatxi auakani xipokini. Iuasaaki itxanako:

—!Erekari. !Erekari. Ia sitatxiti miramaneri !auaika. Papirónia sitatxiti !auaika. Kãkiti kaposotiirerini xipokapeka. Æti oaranoka arikatxi xipokapena ninoa imaerekanina xika.

¹¹ Ikini itixiti tiitxi vëtxitakani apaka txiapatako. Ninoa maerekaxinireninoka itxanako sitatxi auakani xipokasaaki.

—Kiripa amotatari atii uatxa? —itxana.

¹² Mitxi ninoa vëtxitari oro, pirata, kai soro pomëkoriri, kai soro kasarori përora inakori. Mitxi ivëtxitarina mãkatxi mata arinio inakori, mãkatxi mata seta inakori, mãkatxi mata põkamarari, mãkatxi mata pomamari pakini, ivëtxitana. Ivëtxitarina ikini sereti aamina eremari inakari. Ivëtxitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. ¹³ Ivëtxitarina kanera, koketxi pakini. Ivëtxitarina kamariãro miha inakori. Ivëtxitarina kamariãro pirãkĩsësi inakori. Ivëtxitarina iãriã, aseitona iĩ, triko, triko pani pakini. Ivëtxitarina kema auĩte, soti auĩte, kavaro, mitekaĩ kavaro anikakiti pakini. Kãkiti apaka ivëtxitana, nitiritxi ĩkapani. Kãkiti ĩto, kãkiti xinire apaka inirekana ivëtxitinina. ¹⁴ Ninoa tiitxi vëtxitakani sãkire sitatximoni:

—Ikinika hĩtii erekari hinireẽkiti xipokaãkapeka. Ikinika hĩtxineirote ! auaika. ! Auaika hãpokaerekatakiti. Hĩtii arikapeka —itxana ninoa sãkire.

¹⁵ Ninoa tiitxi v̄txitakani katxineiroterini itx-auana, kotxi kãkiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi v̄txitakani timanãta õtakoxiti, kotxi ipĩkarina sitatxi arikini. Itxiapatana. Imatinaniuatana. ¹⁶ Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mãka pakaroneri, pomamari, põkamarari pakini. Oĩtoã aua oro, kai soro pomẽkoriri. Pérora pakini aua. Oia sito atokokana ia sitatxi. ¹⁷ ãti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo ãki sikani, maporo ãki parĩkauatakani apaka õtakoxiti atamatarina iua sitatxi arikini. ¹⁸ Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari !auari —itxana ninoa.

¹⁹ Iuasaaki itakarina atapani ikiiãna imatinaniuatiniãna. Itxiapatana iuasaaki. Imatinaniuatana iuasaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikini mane maporo auakini apakapari kaiãopokoro txineiro, kotxi iuaã auari txineiropokoni. Eereka ãti oara napaka atoko ixipokapeka ikinika —itxana isãkirena.

²⁰ Hĩtepekana Teoso tixine auakanii hĩpoxokoniuatoko iua sitatxi xipokiniã. Hĩte Teoso nakitiakori hĩpoxokoniuatoko. Hĩte Xesosi

moianariakorii, hĭte Teoso sĕkire sĕpiretakanii pakini hĭpoxokoniuaatako, kotxi Teoso arikapekari iua sitatxiĕ auakani hĭte imisiritinina xika.

Kai Miramaneri Potxoari Uinitimoni Okiko

²¹ Eereka ĕti Teoso nitiri kataparari maĭkari kai meraminapoari. Kai triko kamiriĕkari atoko itxa iua kai. Okari potxoari uinitimoni. Iua txari:

—Itapararitika kai nokini atoko, Papirĕnia sitatxiti miramaneri xipokini. !Atamataĕkaika sitatxi iuaĕ —itxa isĕkire.

²² Itxari iua sitatximoni:

—Xikari !ikenakotaĕkaika ereĕ. !Auaika xikari viorĕokata, koitxikata, trĕpeta pakinikata. Ereĕ kĕkiti parĭkauatini !auaika. Atarokiri kamiko ene !kakenakotikoikari. ²³ Tirikapĭ kamara !kamatikoikari ereĕ. Taniriuatakani kiinirite ene !kakenakotikoikari. Ereĕ mitxi vĕtxirauatakani apĭari itxauana. Ninoa atoko inakari !auari ikini itixiti. Kĕkiti ereĕ auakani misirienetana ikini kĕkiti ikini itixiti auakani, kotxi ninoa sĕkire maerekatinoka —itxa Teoso nitiri sĕkire.

²⁴ Papirĕnia sitatxiti misiritaĕka, kotxi iuaĕ auakani okapena Teoso sĕkire sĕpiretakani kĕkiti Teoso nakitiakori. Ikinimane kĕkiti itixi okakoni xika Papirĕnia sitatxiti xipokaĕka.

19

Areroia, Peerekari Teoso

¹ Eereka nikenakotari kĕkiti sĕkire, kaiĕopokori kĕkiti Teoso tixine auakani. Itapasĕkireritikana itxana:

—Areroia. Peerekari Teoso. Ate Teosone makatxakari kĕkiti maerekani. Kaiotximereri

aTeosone. Kaposotiireri. ² !Ikerokari ikamak-iti, kotxi atão inakaranoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatx-iti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati itotxi nireẽkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sãkire.

³ Iuaĩkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ãtipirika —itxana.

⁴ Iuusaaki ninoa totiakori vĩtxi koatro pakini, ninoa okĩtxinoka xãpokaĩtotakini ipi ipi pakini apaka, ipamakana Teoso apisatoõ. Iuusaaki Teoso topãkanãta auĩtetxi topanere nopini. Ninoa misãkiretari iua:

—Pite aTeosone. Peerekai pite. Ameẽ, areroia —itxana ninoa.

Soti Auĩte Ītanorouatini Kiiniriti

⁵ Eereka nikenakotari Teoso topanereẽ auakari sãkire. Itxari:

—Hĩte Teoso nitiriakori ikini itixiti auakanii, “Peerekari aTeosone” hĩtxako. Hĩte auĩtetxi inakanii, auĩtetxi minakanii apaka, hĩpĩkiniãri Teoso, “Peerekari aTeosone,” hĩtxako —itxa.

⁶ Iposo atoko nikenakotari itomaneri kãkiti sãkire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sãkire:

—Areroia, peerekari Teoso, kotxi aTeosone, Apiananiri, kaposotiireri, ikinimane auíte itxaua —itxana ninoa.

⁷ —Mapoxokoniuaata. Apoxokoniritika masãkirauata. Matxari: “Peerekari Teoso.” Teoso Soti Auítene Ítanorouatini iketo apokaþeka. Ítaniriuatakaro iua Íkapani oãiamataþeka. ⁸ Osikaãka mãkatxi ereri, kasarori oieretaãkiti tĩkane —itxana ninoa sãkire.

Teoso nakitiakori kamakiti atão inakari oa mãka atoko itxa.

⁹ Ipošo atoko iua Teoso nitiri txano nota:

—Ia piõkatsopata. Iua Soti Auíte Ítanorouatini kiiniriti kemaítxitakoni poxokoniuaata —itxa notamoni.

Iuaĩkana itxano:

—Ia nisãpiretakiti Teoso sãkire atão itxa.

¹⁰ Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auiãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹ Eereka natamatari Teoso tixineẽ auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereẽri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão.

¹² Oki xamina tirinakari atoko itxa. Ikiiã ito auñtetxi saporietane aua. Iuãka iõkatakori iitoã aua. !Kimarotikori iua uãka. Iuanoka imarotari iuãka. ¹³ Arëkatxinoka imãkaã aua. Iua akiritaãka, “Teoso Sãkire” inakori. ¹⁴ Isotatoneakori, Teoso nitiriakori Teoso tixine auakani, saãpota iuakata. Iua ìkiika. Ninoa apaka topãka kavaro kasarori nopini. Imãkana peereri, kasarori. ¹⁵ Iua “Teoso Sãkire” inakori namaã opokika iouata mitaro neenamtxi ikamini ìkapani. Kuanaro. Iua iouataneẽ okanako imokaiakarini ikini ãti uãka, ininiã ikini ãti uãka auñte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanãkare ova katxaratiko atoko itxako. Teoso iteene omanãkarauata iuasaaki kãkiti maerekani xika. ¹⁶ Iua “Teoso Sãkire” inakori mãkaã, itapikeẽ apaka iõkataãka: “Auñtetxiakori auñte. Apiananiri,” iõkataãka.

¹⁷ Iposo atoko natamatari ãti Teoso nitiri. Atokatxi iotximereẽ itima. Iua itaparakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

¹⁸ —Hina. Auñtetxiakori xini hinika. Sotatoakori auñteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kãkiti xini, nitiritxi iamotakoni xini, nitiritxi minakanua xini, kãkiti apiatakani xini, kãkiti mapiatakani xini apaka hinika —itxari itano araãkani.

¹⁹ Eereka nitikari iua potxoari uinitikiri. Iuakata aua itixi auakani auñteakori, isotatoneakori apaka. Ninoa apotiitaua, iua kavaro kasarori nopini topãkakari isotatoneakorikata

inaiatinina ìkapani. ²⁰ Iua neenamatchi xipoka atoko, iua potxoari uinitikiri maikaaka. Isãkire sãpiretakari, atão minasãkiretakati, imaikaaka apaka. Mitxi iua kamari posotiiretxi iua potxoari uinitikiri ìkapani. Ikara posotiiretxi xika imisirienetana ninoa potxoari uinitikiri takaõtxikare auaõtatakini. Imisirienetana ninoa iua kai kamakori teosonetakani. Iua potxoari uiniti pokikaatakari, isãkire sãpiretakari pakini, auãkipanika okaaka ipoa atoko inakarimoni, ãxõpiri arikiniãtaã. ²¹ Isotatoneakori okapeeka iouataã, kavaro kasarori nopini topãkakari namaãkeroã. Iuusaaki ikinika maiori nikapena ninoa xini. Kamitopekana. !Iposotaikarina ikinika okakoni xini inikinina.

20

Mio Anokananisaaki

¹ Eereka nitikari Teoso nitiri katxakaãpotini Teoso tixine ìkari. Iuakoã iua minaro xavi iua mamapotõkire irikotimoni. Apaka iminari kohẽtxi mitari. ² Iuusaaki imaikari iua imini mitapoari. Kitxakapirõkarikara iua imini. Iua maerekani matamatakoni auite, Satanasi inakori. Iua maikari Satanasi. Iaxirikari kohẽtxiã, mio anokanani imatõpokotakani tãkane. ³ Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã !apakata itore matakakiko. Ininiã mamapotõkire irikoti ãki ikaikota Satanasi. !Iposotaikari imisirienetiniri ikini itixiti auakani. Mio anokanani auako iriko ãki iua Satanasi. Mio ano napaaka atoko auiritaaka ipokõkini. Mapaõtinoka auiritaaka mapara auini.

4 Eereka natamatari auñtetxiakori topanere. Kaiãopokori auari iuaã. Natamatari iua topaneretxi nopini topãkakani. Ninoa txĩkitaãka auñtetxi ininiuana. Iuasaaki natamatari apanakini kãkiti. Mitxi sauakanopitakoni. Okapeẽkana Xesosi iokanapirena, Teoso sãkire pakini isãpiretinina xika. ! Iteosonetarina iua potxoari uinitikiri. Iua kai kamakori ! iteosonetana. Iua potxoari uinitikiri takaõtxikare ! itakana iteẽtaãna, iuakoãna pakini. Iuaĩkana auapekana. Auñtetxi itxapekauana Kristokata. Mio anokanani auñtetxi itxauana. ⁵ Ikara ipĩkani õkitikiko merepanika ipĩkani õkitikiko. Iua mio anokanani napaãka atoko apanakini ipĩkani õkitikaãka. ⁶ Ipĩkani merepanika õkitikiko iuaĩkana auãki ininina ĩkapani, Teoso nakitiakori itxauana ninoa. Teoso sikari erekari ninoamoni. ! Atatsiitarina ãtião ipĩkitxi Teoso misiritakasaakina maerekati kamakani. Sasetotxi itxauana, kotxi Teoso nireẽkiti ikamana. Kristo nireẽkiti apaka ikamana. Mio anokanani auñtetxi itxauana Teosokata.

Satanasi Xamina Mitapoarimoni Okiko

7 Mio ano napaãka atoko, Satanasi kateia ãki auakari, sikakaãkako. Ipokĩka mapara. ⁸ Iuasaaki Satanasi ĩpirixititari itixi kãkiti ikini ãti uãka imisirienetini ĩkapani. Iua misãkiretari ãti uãka Koki inakori, Makoki inakori pakini. Txamari na atão isãkire. Inirekari ninoa neenamauatini iuakata. Apitiitana ninoa Teoso nakitiakori iniatinina ĩkapani. Itori kãkiti Satanasi apotiitakini. Uini ikipatxite atoko itxana.

⁹ Īpirixititarina itixi. Iakirokarina Teoso tire-takiti sitatxiti, kākiti Teoso nakitiakori auiniātaā. Iuasaaki xamina iaxitikiri katxaka. Ixipokana ninoa ikinikana. ¹⁰ Iuasaaki Satanasi, kākiti misirienetakari, okaāka arikatxi mitapoarimoni ēxópiri arikikoātaā. Iua potxoari uinitikiri, isākire sāpiretakari pakini okapeēkaika iuaā. Iuaā ninoa atatsiirauatapikako pokamara, ĩkanōka ātipirika. ! Ixipoka ninoa atatsiirauatini.

Ipinakani Apakapari Iparĭkana Īki

¹¹ Eereka natamatari auĭtetxi topanere kasarori mitari. Natamatari iua inopini topākakari. Iuasaaki patimari iaxiti, itixi pakini ereēkokini iua topākakari apisatoō. Iaxiti, itixi pakini kona katamatikoikari. ¹² Iposo atoko natamatari kākiti mitxi ipinakani timini Teoso topanere apisatoō. Kākiti apiarini, kākiti poiāorini pakini tima Teoso apisatoō. Iposo atoko itori aātsopa katamēkitataāka. Iua aātsopaā aua ikinika kākiti kamakiti. Apaka āti aātsopa katamēkaāka. Kākiti uāka aua iua aātsopaā Teosokata auakani ĩkapani. Iuasaaki ninoa mitxi ipinakani apakapari ikamakitina ĩki uai itixiā auakasaakina. ¹³ Ninoa mitxi potxoari uiniti āki ipinakani apoka iuaā. Mitxi kipatxiā ikatakoni apaka apoka iuaā. Ikini kākiti ipĭkani auiniātaā auakani apoka iuaā. Ikinika apakapari ikamakitina ĩki, ikamakitina itixiā auakasaakina. ¹⁴ Eereka ipĭkitxi, ipĭkani auiniātaā pakini okaāka iua arikatxi mitapoarimoni. Iua arikatxi mitapoarimoni iuaĭkana kākiti ipina ātiāo ipĭkitxi maxipokatimoni. ¹⁵ Kākiti ātipirika Teosokata

auakani uãka aua Teoso aãtsopateẽ. Kãkiti iuaã mauauãkatakani okaãka iua arikatximoni.

21

Iaxiti, Itixi Pakini Amaneri Txapekaua

¹ Eereka natamatari iaxiti amaneri, itixi amaneri pakini. Iaxiti mitxiri ereẽkokape. Ìkora itixi mitxiri ereẽkokape. Potxoari uiniti !auaika.

² Natamatari Teoso sitatxine Xerosareẽ amaneri. Iua sitatxi Teoso tixinekiri. Teoso paniãtari iua sitatxi ìkorapokoriti apokini. Natamatari ikatxakaãpotini. Iua sitatxi peereri. Sito ìtaniriuatakasaaki, omãka peereri oìtanirimoni osini ìkapani. Oa sito erero atoko itxa iua sitatxi.

³ Nikenakotari Teoso topanereẽ auakari sãkire. Itapasãkireritika itxari:

—Uatxa Teoso kamari iua auini kãkiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua.

⁴ Iuasaaki iua kaxipokariko ninoa oki ãtsaã. !Itxi-
iapataikana. Ipìkitxi !auaika. Matinanitxi !auaika.
Ãtsaãtxi !auaika. Katsiiri !auaika. Ikinipoko
mitxiri ereẽkokapeka uatxa —itxa.

⁵ Iua auìtetxi topanere nopini topãkakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piõkatsopatarì nisãkire, kotxi nisãkire atão.
Nisãpiretakiti apokapitikako.

⁶ Apikomoni itxano:

—Uatxa niparĩka xipopeka. ! Auaika.
Merepitipanika iõka Aopa inakori atoko nitxa,
kotxi nota merepitipanika aua. Imapotõkire
iõka Ómika inakori atoko nitxa, kotxi ikinipoko

mapotōkire nitxaua apaka. Nisikari kākiti posonatakani iātini ĩkapani. Na ninirekari ĩki. Iātarinako āparaā amomoākiri. Iua āparaā txīkitakari kākiti ātipirika Teosokata auini. ⁷ Nisikariko iua āparaā kākiti Satanasi nireēkiti makamakanimoni. Ninoa Teosone nitxaua nota. Nota anaakori itxauanako ninoa. ⁸ Kākiti mataparaxinireni okaākako xamina mitarimoni. Teoso sākire mauikakani apaka okaākako iua xaminamoni. Maerekati potxitakani, kokanirini, maerekati iītoāna potxitakiti kamakani apaka okaākako xamina mitapoarimoni. Miīti apaka okaākako iuamoni. Teoso kamakori teosonetakani okaākako iuamoni. Ikinika kākiti maxikatīika sāpiretakani apaka okaākako xamina mitarimoni. Ninoa kākiti ikinikana misiritaākako arikatxi mitariā, ēxōpiri arikikoātaā. Iuaā kākiti iuaīkana ipina, ātiāo ipīkitxi maxipokatimoni —itxa iua auītetxi topanere nopini topākakari sākire.

Xerosareē Sitatxiti Amaneri

⁹ Ninoa Teoso nitiriakori setxi, iātatxi setxi auakini, āti ina notamoni. Iua txari:

—Uai pina. Noerekaiko pite iua Soti Auīte tiretakito ĩtanoro ĩkapani —itxa.

¹⁰ Iua Erekarī Matamatakoti anikano nota. Itxīkitakari Teoso nitiri anikinino oxiratarī nopini. Mitaxiratarīā oerekano sitatxi Teoso nakiti Xerosareē inakori. Natamatari iua sitatxi Teoso tixine potorikakari katxakaāpotini ĩkorapokoritimoni. ¹¹ Teoso iotximeretxikana aua iua sitatxi. Kai pomēkoriri kakaroneri xāsipi inakori mēkorīkini atoko itxa iotximere. Iua sitatxi iotximere peereri. Kristao mēkori atoko itxa. ¹² Pirikeri kai kamakori piriketari iua sitatxi.

Iua pirikeri mitapoari, pañtanori. Iua pirikeri tosi itore aua. Teoso nitiriakori iaxitikini tosi nĩkataru iua tosi itore. Ikinika itore nopini iõkataãka Isaeo anaakori uãka, kotxi Isaeo tosi imiakori aua. ¹³ Ipi ãti pakini iua itore atokatxi pokĩkinimoni. Ipi ãti pakini iua itore atokatxi pokĩkini sanaremoni. Ipi ãti iua itore atokatxi pokĩkini ikikomoni. Ipi ãti pakini iua itore atokatxi ereẽkokinimoni. ¹⁴ Iua sitatxi pirikere tosi kai mitari nopini ikamaãka. Ikinika iua kai nopini Soti Auĩte moianariakori uãka iõkataãka, kotxi Soti Auĩte moianariakori tosi aua.

¹⁵ Iua Teoso nitiri notakata sãkirauatakari aua aãke oro kamakori iuakoã. Iua aãke iua sitatxi, itore, ipirikere pakini iaõtiko. ¹⁶ Sitatxi tore atokatxi pokĩkinimoni ipotorika. Itore atokatxi ereẽkokinimoni apoka. Iaõtari ipi mio, koatrosẽtosi pakini kirómetro. Maioakari. Iuaĩkana ipotorika sitatxi itore atokatxi pokĩkini sanaremoni. Itore atokatxi pokĩkini ikikomoni apoka. Iaõtari iua atokotxikana ipi mio, koatrosẽtosi pakini kirómetro. Eereka iaõtari sitatxi ãtano timakari. Iua atokotxikana ipi mio, koatrosẽtosi pakini kirómetro. Iua Teoso nitiri iaõtari iua sitatxi iua aãkeẽ. ¹⁷ Iua Teoso nitiri iaõtari pirikeri timakari. Sesẽta metro ãtano. Teoso nitiri iaõrauata kãkiti iaõrauatinu atokokana. ¹⁸ Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. ¹⁹ Iua kai mitari pirikeri patapi auakari ipataãka ikini sereti kai soroã. Pomẽkoriri, kakaroneri iua kai soro.

Ãti iua kai mitari aua kai soro xásipi inakori.

Ãti iua kai mitari aua kai soro sapira inakori.

Ãti aua ákata inakori.

Ãti aua esimeráota inakori.

²⁰ Ãti kai mitari aua kai soro satónia inakori.

Ãti kai mitari aua kai soro sátxio inakori.

Ãti aua krisórito inakori.

Ãti aua periro inakori.

Ãti aua topásio inakori.

Ãti aua krisópraso inakori.

Ãti aua xasĩto inakori.

Ãti aua ametxísita inakori.

²¹ Iua tosi itore tosi kai kasarori kamakori. Iua kai kasarori pérora inakoro. Iua itore átika, pérora átoka kamakori. Oro kamakori itxaua kimapori. Peereri. Pomẽkoriri. Kristao atoko itxa ahoa.

²² Kona natamatari Teoso misákiretiko aikoti. ! Auari iua aiko iua sitatxiã, kotxi Teoso Apiananiri kaposotireri, iua Soti Auĩte apaka iuaã auapikana. ²³ Iuaã ! inirekaãka atokatxi, kasiri pakini sitatxi iopinikini ĩkapani, kotxi Teoso iotximere iopinikari ikinipoko. Iua Soti Auĩte sitatxi tirikapite atoko itxaua. ²⁴ Kãkiti maerekanitxi mauakini ikini áti uãka auari iua kamaraã. Kãkiti ikini itixiti auakani auĩteakori apokako iuaã Teoso ipaxitinina ĩkapani, inirekakitina Teosomoni isikinina ĩkapani. ²⁵ Iua sitatxi tore imatakakaãkapika. ĩroãpikana kãkiti. ! Itotaãka, kotxi ĩkanõkari !auari iuaã. ²⁶ Kãkiti ikini itixiti auakani anikariko ikinipoko erekari iua sitatximoni Teoso ipaxitinina ĩkapani. ²⁷ Kãkiti maerekati kamakani !auritaãkana ĩroinina. ĩtotxi nireẽkiti kamakani !auritaãkana ĩroinina. Atão masãpiretakani apaka !auritaãkana ĩroinina. Kãkiti Teoso iõkauãkatakini aãtsopateẽ, ninoanokara auritaãka ĩroinina iua sitatxiã. Iua Soti Auĩte aãtsopateẽ auauãkatakani auapikako Teosokata.

22

Iua Āparaã Iātakari Aua Teosokata Ātipirika

¹ Eereka iua Teoso nitiri oerekano sōtoāri. Iua sōtoāri mapotōkire ikiitaā Teoso itopanere aua. Apaka iua Soti Auīte itopanere aua iuaā. Iua āparaã peereēri. Kristao mēkori atoko itxa iua āparaã. Iua āparaã iātakari ! ipina. Ātipirika auapika. ² Iua sitatxi apanīkaki aua ahoa mi-tapoari. Iua sōtoāri sa ahoa apanīkaki. Sōtoāri ĭtinikata aua amātiirinape. Iua amātiiri tximakani ! ipina. Auapikana. ! Ipinaikana. Kasiri iaōka iriuata iua amātiiri. Āti kasiriti iri ātiāo, eereka āti kasiriti ātiāo. Iuaīkana āti kasiriti ātiāo. Itxaāpota iua amātiiri iriuatini iuaxiti. Tosi pakini kasiriti amātiiri iriuata. Amātiiri tsoa sikataparatarī kākiti ĭto, ikinimane kākiti itixi auakani ĭto.

³ Teoso misiritiniri kākiti ! auaika. Teoso, Soti Auīte pakini auītetxi itxauana iuaā. Teoso nitiriakori itixi auakani kamari iua nireēkiti. ⁴ Ninoa ātamatariko itoō. Teoso uāka iteētaāna auako. ⁵ Īkanōka ! auaika iuaxiti. Kākiti iuaā kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaā. Kākiti iuaā auakani auītetxiakori itxauana ātipirika.

⁶ Eereka iua Teoso nitiri txari notamoni:
—Atāo nisākire. Ia iaōka apokapitikako. Teoso Apiananiri sikari Erekari Matamatakoti isākire sāpiretakanimoni. Iua paniātari initiri itixine auakarī oerekinina initiriakori itixi auakani Teoso kamakiti apokini apisapanika —itxa iua Teoso nitiri sākire.

Xesosi Kanapiriini Pirena

⁷ —Híkenakota —itxa Xesosi. —Patimariko napokini ereẽ. Ia aãtsopa sãpiretari ereẽ nikanapiriini pirena. Kãkiti auikiniãri Teoso sãkire ia aãtsopa sãpiretakiti, apakapari erekari Teoso sikakiti —itxa Xesosi.

⁸ Nota Xoão sãpiretai híte nitiãkiti. Nikenakotakiti apaka nisãpiretai híte. Ikinika nikenakotaka atoko, ikinika natamataka atoko, iuasaaki nipamaka iua Teoso nitiri apisatoõ, kotxi iua oerekari ikinipoko notamoni. Nipamaka iua apisatoõ Teoso apisatoõ nipamakini atokokana. ⁹ Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso sãkire sãpiretakani Teoso nitiriakori itxauana. Ni-noa atokokana nitxa nota. Ikini kãkiti ia aãtsopa sãpiretakiti auiãkani Teoso nitiriakori itxauana. Ni-noa atokokana nitxa nota. Teoso apisatoõnoka pipamakiniã atão —itxa Teoso nitiri sãkire.

¹⁰ Iuaĩkana itxano nota:

—Ia aãtsopa sãpiretari Teoso kamakiti apokini apisapanika. Na pikipatapiri ia aãtsopa sãpiretakiti, kotxi paĩtiki Teoso sãkire iaõka apokapitikako.

¹¹ Maerekati pikamapanika pinakasaaki, ininiã apikomoni maerekati pikama. Maerekati piĩto nireẽkiti pikamapanika pinakasaaki, ininiã apikomoni pikama. Atão inakari pikaminiã, apikomoni atão inakari pikama. Teoso nireẽkitinoka pikaminiã, ininiã apikomoni Teoso nireẽkitinoka pikama —itxa.

¹² —Híkenakota —itxa Xesosi. —Patimapaniriko napokini ereẽ. Nimiriko ikinimane parĩka ĩki ninoa apakapini ĩkapani. ¹³ Iõkatxi merepitipanika

auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴ Teoso sikari erekari iua nireẽkiti kamakani-moni. Ninoa kãkiti auiritaãkako Teoso amãtiirite itxminina auapika ininina tĩkane. Auiritaãkanako ãroinina Teoso sitatxineẽ. ¹⁵ Kãkiti maerekati iĩtona nireẽkiti kamakani ! auiritaãka ãroinina iua sitatxitiã. Miĩti, ãtanoro minakatokatika sirĩkakani, kokanirini pakini ! auiritaãka ãroinina iua sitatxitiã. Apaka kãkiti ikamakitika teosonetakani ! auiritaãka ãroinina iua sitatxitiã. Aãpirena potxitakani, atão minasãkiretakani pakini ! auiritaãka ãroinina iua sitatxitiã.

¹⁶ —Nota, Xesosi txaua. Nota paniãtari ninitiri nitixine auakari sãpiretiniri ia nisãkire pitemoni, ininiã ikara pite sãpiretanako Teoso misãkiretikoãtaã apotiitakaniua. Tavii apika mekanirirano nota. Iõriki mitaro pokamara iatokopeka inakasaaki ãkaro atoko nitxa nota —itxa Xesosi.

¹⁷ Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hĩte ia nisãkire kenakotakanii, hĩtxariko:

—Uai pina.

Hĩte posonatakanii, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika inĩkitaãkari. Ia ãparaã Teoso sikakiti kãkitimoni. Na piĩkitxitari.

¹⁸ Nota, Xoão, òtākikari kākiti ia Teoso sākire iōkatsopatakori kenakotakani. Ia Teoso sãpiretakiti apokini apisapanika, isãpiretaua. Ia aãtsopa sãpiretari kākiti misiritiko. Ninoa misiritiko atokotxikana Teoso misiritai hĩte, hĩkoketiniãri hĩteka sākire Teoso sākirekata. ¹⁹ Kākiti kipatiniãri ipixini ia Teoso sãpiretakiti iōkatsopatakori, Teoso ! auiritari iua tximiniri iua amãtiiri kākiti auapininiika inĩkitaãkari. ! Auiritari iua ĩroini isitatxineẽ. Ia aãtsopa sãpiretapekari iua amãtiiri, iua sitatxiti pakini.

²⁰ Xesosi txari:

—Ia niokanapirena atão. Iposopeka napokini tĩkane.

Atxari iuamoni:

—Ameẽ. Ari, uai pina Xesosi, Apiananiri.

²¹ Xesosi Apiananiri sikari ikinipoko erekari ikinimane Teoso nakitiakorimoni. Ameẽ.

Teoso sãkire amaneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022
253eaec7-f0c7-5b49-b6be-65ee5354d0ed